

落落齋遺集





97.451
5339
248

48

Inches
Centimetres
1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100
101
102
103
104
105
106
107
108
109
110
111
112
113
114
115
116
117
118
119
120
121
122
123
124
125
126
127
128
129
130
131
132
133
134
135
136
137
138
139
140
141
142
143
144
145
146
147
148
149
150
151
152
153
154
155
156
157
158
159
160
161
162
163
164
165
166
167
168
169
170
171
172
173
174
175
176
177
178
179
180
181
182
183
184
185
186
187
188
189
190
191
192
193
194
195
196
197
198
199
200
201
202
203
204
205
206
207
208
209
210
211
212
213
214
215
216
217
218
219
220
221
222
223
224
225
226
227
228
229
230
231
232
233
234
235
236
237
238
239
240
241
242
243
244
245
246
247
248
249
250
251
252
253
254
255
256
257
258
259
260
261
262
263
264
265
266
267
268
269
270
271
272
273
274
275
276
277
278
279
280
281
282
283
284
285
286
287
288
289
290
291
292
293
294
295
296
297
298
299
300
301
302
303
304
305
306
307
308
309
310
311
312
313
314
315
316
317
318
319
320
321
322
323
324
325
326
327
328
329
330
331
332
333
334
335
336
337
338
339
340
341
342
343
344
345
346
347
348
349
350
351
352
353
354
355
356
357
358
359
360
361
362
363
364
365
366
367
368
369
370
371
372
373
374
375
376
377
378
379
380
381
382
383
384
385
386
387
388
389
390
391
392
393
394
395
396
397
398
399
400
401
402
403
404
405
406
407
408
409
410
411
412
413
414
415
416
417
418
419
420
421
422
423
424
425
426
427
428
429
430
431
432
433
434
435
436
437
438
439
440
441
442
443
444
445
446
447
448
449
450
451
452
453
454
455
456
457
458
459
460
461
462
463
464
465
466
467
468
469
470
471
472
473
474
475
476
477
478
479
480
481
482
483
484
485
486
487
488
489
490
491
492
493
494
495
496
497
498
499
500
501
502
503
504
505
506
507
508
509
510
511
512
513
514
515
516
517
518
519
520
521
522
523
524
525
526
527
528
529
530
531
532
533
534
535
536
537
538
539
540
541
542
543
544
545
546
547
548
549
550
551
552
553
554
555
556
557
558
559
560
561
562
563
564
565
566
567
568
569
570
571
572
573
574
575
576
577
578
579
580
581
582
583
584
585
586
587
588
589
590
591
592
593
594
595
596
597
598
599
600
601
602
603
604
605
606
607
608
609
610
611
612
613
614
615
616
617
618
619
620
621
622
623
624
625
626
627
628
629
630
631
632
633
634
635
636
637
638
639
640
641
642
643
644
645
646
647
648
649
650
651
652
653
654
655
656
657
658
659
660
661
662
663
664
665
666
667
668
669
670
671
672
673
674
675
676
677
678
679
680
681
682
683
684
685
686
687
688
689
690
691
692
693
694
695
696
697
698
699
700
701
702
703
704
705
706
707
708
709
710
711
712
713
714
715
716
717
718
719
720
721
722
723
724
725
726
727
728
729
730
731
732
733
734
735
736
737
738
739
740
741
742
743
744
745
746
747
748
749
750
751
752
753
754
755
756
757
758
759
760
761
762
763
764
765
766
767
768
769
770
771
772
773
774
775
776
777
778
779
780
781
782
783
784
785
786
787
788
789
790
791
792
793
794
795
796
797
798
799
800
801
802
803
804
805
806
807
808
809
810
811
812
813
814
815
816
817
818
819
820
821
822
823
824
825
826
827
828
829
830
831
832
833
834
835
836
837
838
839
840
841
842
843
844
845
846
847
848
849
850
851
852
853
854
855
856
857
858
859
860
861
862
863
864
865
866
867
868
869
870
871
872
873
874
875
876
877
878
879
880
881
882
883
884
885
886
887
888
889
890
891
892
893
894
895
896
897
898
899
900
901
902
903
904
905
906
907
908
909
910
911
912
913
914
915
916
917
918
919
920
921
922
923
924
925
926
927
928
929
930
931
932
933
934
935
936
937
938
939
940
941
942
943
944
945
946
947
948
949
950
951
952
953
954
955
956
957
958
959
960
961
962
963
964
965
966
967
968
969
970
971
972
973
974
975
976
977
978
979
980
981
982
983
984
985
986
987
988
989
990
991
992
993
994
995
996
997
998
999
1000

TIFFEN Color Control Patches

© The Tiffen Company, 2007




落落齋遺集卷八

理署書牘上

上按院張見平

伏承台諭收武勇以雪國恥業傳示袁知府著意采擇乃浹月以來募兵之令寂無應者里巷之間已有畏心近齊集四縣之兵屢行簡練之法疲者望寒風而色削壯者舉塊石而氣消甚有力尚可勝勉作柔怯選人前茅叩首乞免此特以撫院選充家丁為名猶畏避若是況望其裹革遼陽哉乃知西江好氣不過私鬪是勇而兵事久廢真苦羸弱難扶今欲作其敵愾之氣生其奔土之心必有格外招徠人情斯奮若以尋常安家行糧為餌未足酬其一歲耕傭之獲以區區挑選兵壯為事安能奪其室家婦子之思竊以為人情所愛者利所畏者法法驅之于後則走險何擇利誘之于前將走死如鶩今都建之民傭工于浮梁之景德鎮賣藝于揚州南京之間者往往而是誠使賞格既設有力能舉百鈞者賞若



干技能中九矢者賞若干仍另給以安家行糧徙木示信散金酬死此厚賞以來之一說也都昌盜風素熾嘯聚成羣招提宿盜名不勝書捕盜之牒騷徧于野此屬改過無由收之有用使示之信令除其前犯苟非殺人強劫其餘概置不問有願赴募者一體立賞仍給以免罪木牌進者有利而退無家則驅之就死也易在倣虞詡三科募士之意而行之此赦過以誘之一說也然使人各就募何人率領散之既渙不相屬合之又食宿無方必先設將領揚旗四出更預備資糧使兵至如歸庶幾有的可赴無令觀望不前乃今之堪將者何人非職之所知也至稅事更新奉行德意兩府一體有餘不足皆公家物也豈宜以虧盈之數上煩清慮哉竊謂剗心滌腸絲毫必報不妨各隨所入仰聽上臺劑衡果其有餘何所祕惜萬一不足寧有私藏如慮稅官不肖之心則在稽核之嚴非成法可束近聞九江額已漸登至北風一猛則照票之外投稅闐然無人總計秋來收數額若中分斯有微溢儻四六爲額則不

足之歎又在南康矣惟是尺式異同寬嚴互見而寬在功令南康初不任德嚴在鈔關九江亦不任怨鈔關先定丈尺九江不費一辭其實鈔關以意爲尺無式可據非得本道酌量短長另設二尺分發兩府則法令不一人心莫信每念鈔關所批去今尺太遠執其兩端斯平等法耳秋季已終孰多孰少老大人提衡彼此微示哀益故不敢以一隅之見孤老大人爲南足國之心也
上按院汪石蓮

某遲于趨事方屏息以聽斧鉞乃老大人天覆春生栽培轉篤竊念下士遭際知己古亦有之未有一見而沐國士之遇如某者也行取疏截自歲終某俸少十日遂落格外然得以一官少效奔走補劓蓋愆庶幾有日顧局局愚昧無可陳說惟是巡道遷行地方失所依賴敢以臆陳九江爲吳楚咽喉從古戰爭之地蜀變方迫江流不寧瑞昌興國間柯陳結梗伏莽嘯聚更兼鄱湖浩濶隱憂方大幸本道大創孱偷之兵一新選募之令鼓舞訓練水陸俱精

遠聘教師捐俸製造火器開局方始忽焉中輟當今人喜因循緩視兵革計本道一行練成之兵解體偷惰器械火藥悉化飛塵長江要衝誰爲砥柱况閩廣兵來無人彈壓而閩兵屯留饒州約束之令不嚴驕子之奉已甚奪財鬪唱大可寒心老夫人俯念地方之重疏請加銜保留實爲無窮之利至于察吏詰盜力振廢弛送舊迎新恐滋騷費此又從來久任之說所必當見之施行者老夫人已洞燭之無俟多贅矣

上藩司董定所

湖關厲政特厘至仁念勳斯春法窮則變台臺以停稅之苦心行撤關之妙法分府投票立票繳查商既得洗其苛官亦可滌其垢職碌碌坐觀有負清問惟是立法之初袁知府苦以見委思維再四實慮負託才力兩窮適荒司刑之職稅璫餘氣頗非志士之心夫議委一年爲期而刑名查盤勢須自還其局况治法千條俱備僅持籌應付而亦莫效其奇竊意委而不可以久不如使職別任

地方之事易軍官來就輕車之駕也台臺方加惠商民職宜效奔走而敢爲此苦瀆者知台臺素憐職久切栽培則出之疑怨之外以全其孤拙之名度亦台臺所許可耳

又

向奉鈞諭已具稟恭候台裁未審已有定議否近代庖府事以積案填委錢糧催督苦莫之應僅了得安義京庫其各祿尚在嚴提度可完報所奉助餉款目特持穀價借支先解本府貧瘠特甚蒙老夫人議免半糶不啻肉其枯骨惟是抵穀銀先詳包撫臺亦准解三分恐不能如半解之例以此乞天覆之恩蓋邇來水災沓至憂在目前此三百金到部僅供鼠蠹雷府儘可救饑萬乞俯賜詳允免其補解又錢法通行民生樂便前所發五十萬袁知府悉已給散兵糧各縣毫未解補不得已亦借庫銀先解儻有錢發下則亦眾心之所樂從也

上巡道朱寰同

稅虐一蘇不惟遠商歌誦至德而星渚貧黎感詠涸轍之澤又自無窮也職最拙劣局局不展蒙台臺提引若以立法之初職能稍體德意以布之故勤勤任使職敢辭勞役仰孤鴻造特以居疑怨之地恐來役杼之危今台臺既許早脫則感戢無涯今亦未敢遽溷台聽也昨已具稟所能自效者寬商之手不能自必者湖口之越關與稅額之不虧夫爲防奸計勢不免多設巡關等役而多人則多弊故盜使有越關不使有冗役僅四名巡關困守湖岸但懸賞格有越關者罰稅一倍以賞有功人役別慮商人領票徑行意欲差人押之入城此一人恐不免需索今袁知府議于下水岸上收籌此法固佳然今之空船人載及微貨免稅者皆卽刻放免徑行並無他票中途亦無人闌阻可謂直截簡便不知何以爲兩安之法也憲稟有丈尺已填旋復告改減少至有并其姓名而易之者率皆貨少難拘丈尺或當全免故塗易頗多悉職親手親發其查量船隻悉職親至河下間抽一船驗之絕不落他人手目第汗

抹憲稟有不恭之罰耳稅額計四日頗爲有餘而就中木簿居三之一使無簿不免有虧今北風大作所虧又未可知也

又

仰承委任已于初七日開關恪守憲規祇令商人自報絕未查量一船權其所入可足一日之額但船雖大小不同亦滿淺各別量于丈尺之間爲裁減之法通融酌量總以奉行惠政其事之瑣屑煩雜日無暇晷幸銀不經目差可自白至剔弊察奸才所素拙每差一役躊躇再四輒復中止卽議設巡關僅用其半蓋盜使商人稍有脫漏斯台臺所云以不撤而撤之心行之也惟是收銀兼用館吏私慮以爲可裁夫納銀在府堂堂正正無嫌可避管稅居積垢之餘須斬斷根苗庶幾清楚若仍插一人作櫃畢竟涇渭難分此非獨自求脫白亦爲後人免謗具文上懇乞賜施行又竹木憲票計根論稅職細思商人論根之法乘積加除須精心熟于算法者方可無訛稅事煩冗恐滋多寡之弊竊與袁知府酌議不若以

長闊深積計論文收銀較爲簡便職以此法爲饒河諸商親算數番較其歲額視饒河尚輕視湖關不啻二十取一也台臺所頒丈式以量船則極寬以量薄稅爲小職曲體商人之意十丈止料其八一薄之稅不踰五兩小者二兩耳如是而台臺惠商之澤無窮矣謹具約法呈覽各役工食若巡閱水手登簿書役尤不可緩否則向爲大利今不免太苦因台臺已念及故併冒瀆容另詳以請

三

前袁知府傳示台諭仰窺台臺爲商爲國至意無窮而稅額虧盈調停于兩府之間則四六分初無不可蓋向之所爭者官入私囊今絲絲登報有餘者原非私物不足者豈能取盈若一時有餘而守爲成額儻後有不足則黠金之歎又將在南康矣如其有餘而必曰此之所收不以補彼之所缺雖甚不肖不至此矧提衡損益總在台臺又非下之可以臆逞也竊謂額可無設也如慮額不足不免以有餘爲私營是又在結核之嚴初不在文法之內惟尺式

至寬按臺欲做鈔關然鈔關特以意爲尺初無可據似不若從前詳所請台臺酌量短長另置二尺頒行兩府則人心自一寬嚴兩忘其規則出入統祈早賜裁定至本簿憲票明云論根及照地稅票今皆論丈尺除饒商之外無稅票可照卽饒票又與今票多寡不同非乞台臺稍易票式不可近者奸商神棍又于南部堂動加稅之呈其說以湖關登報無幾今登報甚多參對官簿加稅顯然此言直可供台臺一笑亦見奸計無窮人心至險使所行之法與所刻之票異是悖違功令職等任之罰矣至總計三月稅銀未盈五千八百而竹木盡在其中則南康未見有餘未卜後日若何也職唇血已枯瓜期已及建昌令莅任在五日期間統希台臺早賜詳委卑職幸甚

四

稅事瑣屑季中不敢零星瀆報謹彙一冊仰備稽察伏念職祇奉憲法矢慎矢公尺式雖寬不敢違功令以取罪錙銖必較亦不敢

損正額以媚商凡漏網窮追照批停格焦唇穿目賈怨已多特于
空船搭載數難取盈間有半科良非獲已至額數一聽上裁本非
量出爲入而九江有鈔關可做原屬初議所頒此奉行之大較也
幸本府冬季頗浮于秋六分之額似亦可辦統維電察

上巡道陸景鄴

久違訓迪深切瞻戀昨奉批答聾聵一開第識疏才弱碌碌簿書
聊託帖括以文其拙乃沐溫言褒獎不勝悚愧台臺文章山斗照
臨斯地諸士承風丕變況江州士尤親炙最切者乎至台示習尚
刁獷事體痿痺二語洞見垣脈霜風一肅吏民敢不革面卽有眞
僞雜糅捕巡縱枉以入日月之照毫髮安能遁形惟是此中惡習
輒以人命爲奇貨都昌往時乘風鼓煽百十爲羣而告詞之不惜
則有杯酒許言直架瞞天之謊者旣不勝其反坐遂爾習爲故常
訟師刁民唾手風波其間亦有愚魯無知爲代書所誤只求狀准
後悔無及儻就九江城中考定代書之人明示其值責令從實填

寫禁絕浮套刁字如原告反坐至徒以上者提代書人并責可也
又三府交界每每冒籍或乞明示承問各官如遇冒籍告批者卽
申明改併如冒批衙門未及改者其原籍府縣衙門徑申本道請
案不得避事推委又有原被告彼此各府如都昌鄱陽湖口尤多
彼此關提互相秦越久稽憲案率此之由使原被告各有告詞者或
示命以奉到先後或府縣上下爲序立限申併不得畱延似亦可
清案牘也他有地方積弊會條列通解兩臺度必仰備參覆成案
見存不敢複說然以條陳塞責正俗吏騫虛飾陋之套且所言鄙
淺尤不足入台臺之鑒因明問下及不敢不强索一二以獻肺肝
惟台臺赦其愚妄昨聞台臺克詰戎兵綢繆未雨江山生色先聲
遠震本府水陸營精兵雖止六百餘人袁知府遠聘教師製造戰
船火器三六九操練賞罰嚴信職亦代庖軍務與分督率營伍氣
色似有可觀如許附入衛軍操演一番則台臺指顧之下鼓舞振
揚將壁壘旌旗煥然一新候有示期乃敢解赴標下文茸奉命謹

職謫劣無似于吏治正如矮人觀場再捧台示直令毛骨悚然通身汗下凡此中水底蠹穴血海冤嘍一一洞入明鏡職三年尸素卽盜情出入不敢不交覆參詳所翻剔成獄亦復不少未免以縱賊見疑蓋名示所云有小偷遠方遊食諸類受網織者比比皆然此有司捕役之過乃若強竊混雜病在失主好爲張皇動列金銀數百至有疏宗插入居爲奇貨備追賊之名施嚇騙之計者竊意強竊之分須審地方保長今強案疊疊並不一問保甲卽查究失事人役輒成虛套自後告狀如止竊也姑從其便如其強也必明立保長某人地方鄰佑某人公同赴告否則不准該縣卽立治其失事之罰另招申報以免牽延則失主不能飾竊爲強而諸人亦不至于牽累之久是亦一說也至獲賊之日立刻追賊賊有一眞卽可正法不必按單窮搜以滋攀擾若夫隔別參互禁絕嚇詐自

在奉行之吏非法所能盡要台臺霜清日白電劈風行吏亦何敢仍守故習以仰負德意乎職代庖捕務督行保甲親試之府城中者向有一二條款成案見在臺端惟是時時查警行一年不聞市民被一小偷儻亦兆之可行而不能必四方之同心也明問下及肝膽畢剖瑣屑無奇統惟照察

三

伏承憲諭敢不一一仰體各兵較閱若蒙節鉞一臨士氣百倍今且先以台旨鼓舞之矣夫役議已于前月二十九入遞稽遲若此亦積玩之一徵也台示以補兵而前詳抵加派蓋緣星子包募牢不可破縉紳士民俱謂奪其喉中之食謹然欲爭及見抵派之議仍在彼土救飢始各結舌適建昌欲爭其半爲設腰站之需然該縣雖云衝煩遽難奪此與彼且旣設腰站則南新協濟原額儘寬矧有裁革蘆潭弓兵餉額可以添補今裁充夫以寬民力及畱爲本府修城募兵之用猶愈于原從走差中花銷此有用之金錢也

伏候明示可否允行官評奉命摘補賞捧大計似不相遠今先求
塞白止得司庾一人舊例原無多索此外惟都昌廖尉稍有可議
尚欲畱備大計取盈統希裁示

四

恭承台諭案無畱贖卽是救時良藥卑職業佩爲韋弦刻刻提醒
不敢有負訓迪但本府積案儘自不少一月停閣血脈中斷方催
督復起終無如各屬之痿痺已久何也營卒聞訛欲散前此偶然
而亦止一二造言生事之人及懦鈍無用之卒耳久已訛息心安
操演如故前職已細閱練一番邇雖天炎啟操三六九分班試之
小教場實不敢頓墮前功也發教師訓督各兵半多捱懶正嚴爲
分班督查因憲限解驗遂暫聽其歸至于月餉賞格悉在營卒之
上職固客禮之卽各兵亦未敢薄待也安義奸人結夥之詳先未
之見奉命後卽差役以一字馳往訊之據該縣答云原在申詳宋
元二十拒捕由中及細查原由亦未明悉不過深明賊黨之宜撲

滅似非別有所據也以此往還詢問報命稍遲伏惟恕其延緩之
罪昨有夫役一議芻蕘之見未審足備采擇否然水路之斷不用
夫則非謾語統希裁斷

五

謹啟粵兵賞格撫按云過省之賞出于本院不屬南康該府但照
吉安例行之及昨詢吉官之過康者云吉安賞格甚重每名米四
升魚肉各一斤每十名酒一罈如此則貧乏南康萬萬不能如例
須乞台示斟酌昨已發人至臨江訪之矣又計事將竣將有議調
賢能邑令之政安令長才短馭定宜別展驥足然安義久成錮疾
砭灸方甦既有易人廢事之慮否則建昌亦康郡中巖邑也近而
調之在彼猶此此職爲一隅私計夏知府亦以爲然敢先以爲懇
至安令之意揣摹建昌一二人情有憚其整頓積弊恐不相安者
此又一人之情不敢不并上聞以備采擇者也

六

承命都之黠賊猖狂已甚然如官兵擒捕之說誠爲未妥台臺明見幽隱計屬萬全職不勝心折竊計二捕之情縱與畏兼有之懼以寓法彼必效力而私意善獲之法不若姑以好語安其賊黨之心使之自來投網卽前日王永道之自來原因職監程昌九彼遂欣然赴愬今旣明示強盜死條二盜自然挺而走險頃職提出王永道但明吏諭之云前番審時見汝等尚有生路如永昂兄弟何不教他出來永明二犯云此事實未做强盜肯照前審救拔永昂兄弟自然來投見此言確是實情但案已成矣復不在職之手是強是竊不知果有疑情否誘之爽信亦有未安所發憲牌卽藏之篋中尚未轉行亦別無知者如一行則賊黨立刻聞信小捉則拒大捉則走縣中爲賊耳目者多故也

上鹽法道

謹啟南康雖僻寂村墟然君子小人食鹽之利者猶是嗷嗷之地向蒙撥派引鹽奸商囤戶每借口波濤之險赴省告改惟有零星

小販以致鹽價騰涌民苦淡食引額不足反礙考成夫開鋪發賣何關湖水之波疆域各分詎容規避之巧今使囤戶居爲奇貨而官民受其兩傷爭之袁知府尚無畫一之令仰惟台臺必洞鑿斯弊不俟贅陳伏乞憲禁自今坐撥南康商鹽不得託故告改別府則貧民飲雨露之施下吏亦易以仰遵功令矣

上驛傳道

向承台臺破格款宴骨醉心銘而仰辱訓迪之惓惓尤非愚拙之所敢冀也職代庖府事纔及數日夏知府到任在卽喜得卸肩乃仰體台臺風霜雨露之用苟可省一分民力者竊有星子夫役一議其源委具在詳中但恐變法爲難有厘軫念而此中舟楫上下一夫無所用之此三尺童子所共知也如謂折乾之名過客不受則從來水手折價原自通行今亦爲折幫水手之名無傷于義況此中過客無非折乾以去又萬耳萬目所共覩聞也此外別無他慮昨已細詢之鄉紳士民莫不謂其可行而各夫專足早差饒有

餘力求免折乾繫頸之苦亦各樂于從命惟一二包占富家意稍不快將亦有以處此恭遇台臺興利除害千載一時若不趁此憲令風行之日蘇此一方之民實爲可惜故敢仰求鼎力毅然主持轉詳刊示儻需再議便落緩局所謂斷乃成者非台臺固不敢望也至以節省之餘半抵加派庶使貧民戴如天之德且使此中包占之家無辭執爭前建昌蒙允腰站之議儻其事獲成則該縣原額夫數撥出儘自有餘又有裁革弓兵工食可湊不須爭此協濟之數故今議抵加派之外仍虛懸二百餘金以俟台臺酌處統惟鑒察立賜施行

上學道魏

向承台臺委任不敢以荒昧爲辭簿書紛擾神昏目盲恐去取乖方夜光按劔然每于擊節之餘如御風而行不知身在炎室中也揣摹佳處率屬前流益歎月照鑑空羣材鼓舞洗滌其往時腐爛之習而沃之清冷之淵江右文風從茲丕變矣數之多寡與發下

舊額在出入間蓋苛索全瑜以一當百青錢萬選正不在多而批語疏澀卑職從來所短無能黠染淋漓伏候台臺衡量而裒益之茲更有怨者府屬遺才鱗集就試憲限甚少相對無色邇來府學及建安兩學文光蔚起多仕蒸蒸安義樊令爲諸生申請加額幾數千言竊惟南康僻瘠往時上臺率以夜郎視之今幸台臺大破常格一爲吐氣自此府屬諸生將得與大國爭雄長不乘此機求廣必使士氣汶頹且歲值龍飛舉額已廣則每學量加科舉亦例之所宜也伏冀俯俞乃敢具文申請其遺才取數亦將稱寬以爲之地統冀格外隆施下吏邀榮多矣乞恩無厭可勝惶悚附請鹿洞科舉申文

爲先賢遺澤未斬多士蒸變有期懇乞照例廣額以弘作人事竊惟白鹿洞肇自李渤尚止友麋鹿之羣興于紫陽遂廣開桃李之化故宮牆特峻廟貌是虔教著洞規名垂國學歷稽昭代文宗若邵二泉李崆峒諸先生嘉興修明借光俎豆但科舉未經另設而

遺才猶有專收前道洪胡尚仍其二至前道黃遂擴爲五雖云分
附各學特典實垂不刊爾時洞士尚驚其名也及本府袁知府再
闢荆榛條畫經制先申聘南昌舒臣以開其先繼申委職以承其
乏職卽未聞道不敢負人兩年來力守先進之閑勉竭書生之吻
月必二會會必手披風雨夜坐于山齋丹鉛畫磨其鐵硯于是裹
糧而至者千里同心四方接踵夫青衿滿眼幾人寒谷長峨書院
紛門何地羣材受範三年之取舍固自同途一日之短長豈宜並
較查吉安白鷺書院科舉四十二人衡其實恐不讓才循其名何
絕相遠在遠方經歲而去捷徑何心而郡中好學者多孤飛無力
幸蒙本道道合先賢望高山斗憐才念熱隻字爲之三思握鑿冰
清片長初無一漏凡茲洞中英俊旣已羣入品題第脫穎分曹止
屬文章之司契而遺珠可拾竊歎舊額之太慳例亦何拘時則已
可使先賢而復起必盛典之弘開伏乞俯將鹿洞遺才照白鷺書
院事例先期另考額爲拾名則賢關大闢不過斟酌調劑之權而

化雨弘施亦生宮牆鐘鼓之色矣

與袁九滌太府

卽欲叩謝臨之辱念日之方中在公小暇未敢遽爾唐突姑遲之
于薄暮而先以數行陳其愚夫行法之初義當效力任使之下亦
有餘榮反覆思維不便者五商人視聽方新規條初布非有精敏
之才不能推行仁術而拙于夢夢端委未悉奉行無策所負德意
不小一也三廳之中敝廳參駁獨多大獄每參末議專心料理尚
苦拙遲儻一日兩番往來湖上日不暇給妨廢實多二也昔人云
若我輩則亦不肯爲三司條例使司此猶宰相之屬官而羞之若
是今以身承貂璫之下風勢須與之周旋丈夫之所短氣三也未
象老苦心刻厲且致流言覽其辨揭辭危情苦不肖悠悠自放安
能免此四也向者人勝法反竄首以避令者法勝人乃奮袂之先
撫心自思轉益之愧五也按臺不云乎府正以監制之自不至于
恣肆此語豈有專屬道尊不云乎有移署建昌之一著斯固明予

以辭之路矣且又有可以爲說者法必信始不容二三今纔委官一年而先以勢必不能一年者應之則法不信矣台臺寬不肖之力全不肖之拙使得從台臺之後補其職業而擴其旁觀之見識于稅事不無關切又不特爲不肖息黥補劓已也此肝膈之要伏惟鑒察

與府屬各縣令

按臺臨郡決在望後矣而各冊未備查敝廳舊例先十日送冊卽星夜參酌尚苦拙遲矧茫無措手處乎鈔謄故紙不煩心手之勞幸嚴督書役刻期見報南山之案固可徐徐毋相擔閣也學道咨取優劣本以憐才心行激勸今優者取信于學霸之偏呈而劣者率出于老博之開報毋論一紙敗人功名毋容草草卽虛張德行祇是一富家翁亦何有焉至于巡歷訪犯正欲從門以內搜之固知神君之庭必無狐鼠或有已經斥逐未盡厥辜彌縫有日肺肝初露者法行自近乃見賢使君風裁若徒就通家之口羅織賣菜

備吾輩何忍意平日案牘猾胥訟棍穢行劣生門下畱心久矣幸速密示

與建昌令羅化城

特啟訪犯一事向承來命業已置之固未敢尋舊格求多于仁讓之里以拂仁人不忍之心也今太翁受命而出當事者甚以爲督蓋狐狸必問自今伊始不欲竟破此額日事之輕重在門下手從中斟酌原多寬政而以美意冒庇下之嫌亦宜深思熟計之也

二
鬼神有知不受不臣之訴僕謂人之聽之則小人之詛乃爲君子之作佛事耳大雅高懷談笑遣之欺服無已詛以爲畏訟以爲德相去無幾此可與知道者言也報最伊邇聞此欣然僕亦從足下之後而此番完缺憂心殷殷來教所云名之不得者則無一善狀之轉語也愛我者乃謬爾推獎耶衙役之頑已成錮疾彼此交相警無他難者獨以積逋如許近例方嚴足下得毋慮妨考乎太翁

誓不發虛批卽意無所指而嚴徵速解朝督暮催似亦足下急務不敢不效忠告

三 遼左破壞誠吾輩聞雞起舞之時一切綢繆牖戶之計都宜著意但聞有倡爲招兵之說而奸猾里胥沿門索詐鄉愚無知聞遼夷而膽碎故奸人得乘間恐嚇且近有道尊募勇敢之示因煽惑益甚夫募者聽其自報非強之也今建昌各鄉紛紛擾擾昨有該縣一匠役在府得工銀四錢歸而爲里長詐去買其免報而鄉間之騷擾則縉紳具道之矣門下曾聞之乎幸速出示禁止仍密訪奸猾重加懲創以安人心此急著萬不可緩旦夕也恃愛密告希留

意 答安義令陳

承諭四難具見良工心苦夫政必知其難而后可以得其易彼居門下之前者皆易視而失之者也寒局忽就熱地出手撒揮何其

快便而不知貽後人以難乃至于此門下超然塵表經畫精心向初晤已心爲地方得人慶今定力深心一番清核便已改觀聞之益爲喜躍總之只此其難其慎著著細入嘉績未有量也借支者作何完補後借者分何款目可得示其詳否京庫未完此爲第一義催徵太急則民心難調在酌其緩急擇多負者而先之冰立之下行以風溫非廢緩之謂也

二 承示四議釐弊衛圍地方實嘉賴之夫百姓之怨不可有也大家衙役之怨又奚恤焉門下勿復慮怨矣

三 接來教清釐積弊實心實政此從來長吏所沈頓于吏書蠹窟中巧蒙上官者也門下乃精核剔發如此反覆諸牘心意俱暢門下堅持此意豈特冠冕匡南蕞爾郡哉倉穀化爲烏有查盤半屬虛文今不佞奉檄清查正期破查盤之套耳虛文空數絲粒不可大

率以查盤所開爲正數以盤驗所少爲侵欺官在則責之官官去則責之吏民買則責民吏折則責吏此縣倉及扣存社倉之穀斷斷不可少虛其還府之穀則有本府查確不在今冊之內然府倉出入亦須查入府冊總在門下作速嚴催趁此穀價方賤之日易于完報門下但嚴諭諸役早完免罪不佞清理具擬尚可十日若出限不完不能爲之寬解也見在之銀解貯府庫至助餉尚在上臺斟酌未至遽空縣儲以入邊門下爲地方永計敢不相體乎

四
考事代送亦無不可至于借貸富戶雖見門下留意漕事然名豈可聞于上也使有口者謂借貸之例自門下開之自不佞代庖使屬縣開之不佞亦何以對士民乎漕糧自有正銀卽不得已庫貯別項或可暫那奈何以急公之誼冒不韙之名也速速已之別論訟者在奸民容有刁詞若謂乘流言訐告則舒廣文並無一字相及不佞豈瞞昧相欺者乎縣負不直遂至于府不佞自有三尺在

門下何慮之深也三縣訟者紛紛安義特四五紙耳府非虛設門下毋容執此成心爲矣

理署書牘下

與邱毛伯

某生平想望台臺如千仞之鳳邈不可卽客歲一刺晉謁不意遂邀道義之知收之藥籠撫心自問豈亦寒冰之骨微有遠于塵垢足當拂拭者乎嗣是束首簿書肺腸都俗旣迴隔玉壺之清而外吏分卑又不敢仰援霜斧以雕刻其朽株故落落至今也咫尺仙居夢想飛越時從敝門人丁生傳詢新禧亦復對五老峰歌兼葭白露之章耳薄采匡雲敬申積悃伏惟台鑒別懇另楮

又

某再啟先祖母幽沈地下三十年矣辛勤百折食貧之常豈敢僭辱彤管而當年苦心淑行可誦可泣子若孫且暮詎忍忘之家大人孺慕至性歷久彌篤家庭告語淚數行下蓋向者恩亭之祀辱

賜名篇淋漓悲痛則知家大人之哀思而憐之者莫台臺若也台
臺手持袞鉞微顯闡幽卽行無他奇或爲節取而家大人屢有嚴
命謂小子不得邱先生一言以光若祖母三十年久沈之懿行雖
倖邀綸封吾弗若子某思維家大人之意祈千秋不朽之筆台臺
憐憫斯心親賜片言則子孫世世戴之而非愚父子結草之報已
也一官匏繫越疆未能謹以狀稿附修薄贊屬敝門人丁生朝棟
代叩階下

答鄒泗山

台臺清時威鳳宇內人龍文章氣節直逼大蘇而過之石畫丹心
可謂宜公再見矣東山久臥月旦名高某江干末學自誦讀制義
之年以至服官仙里之日瞻雲依斗夢寐神馳願雖未展于識韓
意則已殷于立雪何期明公俯垂青翰更辱賢孫問道于盲夫家
學淵源令德啟後脫貴介之習而勤學問之途斯固已超凡近而
步天衢矣他山之石又安所自效哉簿書碌碌心眼俱塵敬以台

意作迷關一棒北面之懷庶于焉慰乎

與舒碣石

闊絕教言忽易春秋矣每瞻鹿洞之寂寥歎白駒之已遠人文荒
落吏積塵容先生道化無方獨弃置斯土不由人不歌渺渺兮予
懷耳茲者敝堂翁袁公攷績小子飽德受知私懷耿耿業從二三
僚佐共獻一觴公而弗私正謀別展而敝同年張忝生以申州遺
蔭并同事新歡迫欲共申此意計不得名公鴻鉅之筆無以表揚
嘉績當今其孰逾先生者乎矧敝堂翁又先生門下士兼以主盟
斯地旣聞政品夫道合則言之也親交彌則語之也備不佞與敝
同年均辱高賢之好則代其心口而抒之也真故此舉無以逾先
生者幸慨然惠教藉手頌歌不徵浮稱而徵至言也懸切懸切
又

某夙抱迂疏之性雖不能領山水文章之妙而寒光苦味差爾相
宜至遇先達率多落落獨先生道義之雅格外見知沐浴清風醇

度以少湔其腸胃剝落其瑕疵三年之淹實惟明賜方書下下考
以待幽黜忽辱獎借過情面被十重甲矣矢不敢拜一綺言竟弗
敢卻大雅之章者弗敢以世格答先生也詠佩不忘與匡雲同供
心肺間非言可謝

答徐明衡

向讀名疏不覺擊節而起竊幸狐鼠破穴魍魎呈影所關匪細昔
太史公論張子房狀貌如婦人女子不稱其志氣弟于年臺亦云
直聲方振銓席屈指以需矣邇聞錦旋又私羨萊彩之舞如弟匏
繫寒衙二親千里白雲悵望定省何年白鹿成羣少生俗吏之色
肺腸冰斷山水差爾相宜然高談制舉愧非其任年臺暇時顧我
尚須分惠丹方庶幾盡度雞犬耳一笑

答黃陽平

山城餘暑夢想層冰忽奉芳題恍如明霞湛露光照秋齋也西山
朝爽信足快人香爐峰下飛泉翠壁紛墮盤几差可慰吏隱之況

恨少滕王一敘耳

與魏廓園

年臺孤標絕俗勁骨凌霄俯視餘子碌碌不啻元龍百尺也丹心
鐵筆獨駁遊移兩可之詞以明春秋斧鉞之義某雖伏在下僚弗
曉世務竊欲止正論以爲非年臺之孤峻他人決不能言天下事
是非二者而已豈有亦是亦非一事而中持之者哉某疏心懶骨
落落自憎向沐年臺收之臭味之末四年以來黽勉一官冰面未
改而迂拙叢愆幽黜在後年臺亦肯惠顧前好俯垂青盼乎

與同年某

恭諗榮晉瑣垣音矢鳳梧下吏式歌且舞雖自年臺分內事而當
此蜩螗沸鳴犬羊不靖之日急則首鼠緩則市爵非吾年臺揚眉
掀髯一宣人心之鬱豈復有日月清朗之象哉伏讀大疏至大家
先保頭顱之語幾欲痛哭在中朝機事帷幄良籌下吏固爾夢夢
而目覩閭里蕭條皇皇憂亂訛言四起水旱相仍蓋亦有厝火積

薪之勢矣誰爲念及安人心選道府者哉不從恩怨起見不以條
議塞責不以筆尖推敗人才不以私交紛爭國是所謂真諫官真
議論舍年臺其誰下吏喜怵之極輒肆妄言聞之他人將不覺一
筆句矣大計在邇罪狀千條恐終難逃此一筆故人天上其憐我
而覆露之乎

與方仁植

都中分袂倏忽三秋每念年丈披裘見憐朗月入懷弟之疏狂特
辱契誼未嘗不寤寐神依也峩眉雪嶺想見清韻孤標卓立天際
而平反之牘摧強鋒伸士憤壁立千仞鏡照覆盆使君法力如此
弟身爲刑官碌碌無所短長見此那得不心折耶立不朽之案遂
脫然去之移福曜于閩南知年丈置此于度外又高人一等矣駕
行不獲作中道主適老年伯舟經滌治得侍丰儀幸以子弟之誼
沐訓誨之勤直提之覺岸非特祛鄙吝而已荒城苦澀卽寶眷舟
次不薦一片見長君玉樹倚風自是王謝家範薄物幾種聊將區

區寒暑之況得毋爲長君所笑乎敝房刻一冊附正大方

答張忞生

邊疆如沸兵戲如兒騷動天下者今且及我江干矣吳兒脆骨江
陰豈有兵乎切切爲故鄉父老子弟憂轉自笑其兒女氣也年兄
慷慨請纓激勸此方忠義心甚壯之日僕僕江岸見中流擊楫斯
則懷年兄時矣去年今日年兄醉我以鹿鳴今日乃附賤名于錦
標引鄒生以入座此官之不落窠者則皆年兄之賜也袁太翁賀
文纔了公事正在索稿按臺新命似落遲局孤城寒寮稍可噓植
者一言九鼎有望回天

答魏仲雪

客秋一函遂爾曠隔正切伊人之思而手書至矣絳帳如雲山川
如黛高傲折腰之吏濃飛門士之杯二樂三樂旣已全收且以其
暇擁琴堂縮墨綬南面而王文人合吏事嘻雪公生韻在我尺幅
中矣若夫春秋之筆進退十五闡孝廉人視爲高下之等新詩如

彈丸脫手骨韻愈高而懷人在眼讀之欲泣欲笑自是阿兄本色
只愧我吏局中手眼都塵腸胃皆俗吟興一掃醉鄉久別碌碌之
狀輒令五老笑人耳尋常理幾疑獄破幾冤招直等之家常茶飯
最苦者官評一事竭畫工之力妝熨母爲西施或猶不免毛延壽
之疑兄謂此官可爲乎不可爲乎差可解懷者所相與之人稍稍
相信家慈在官舍一兒子嬉嚷于旁近復構一小閣可以望匡山
曉暮雲風之變公事多暇放腳長眠郡雖人士鄙儻聊可恣吾塗
抹前者署郡半年與凡平日四方交關從未汗我兩手以此不負
知己也得失冷熱直以命付之後事茫茫卸擔無日安能如兄且
暮作國子先生哉邊報孔亟吾君吾相急而緩圖之匡山之足恐
未能穩臥奈何奈何房稿一冊聊復爾爾不足誇傳也

又
家嚴來得手札讀之恍然如面時悠悠在我心眼間也銓務久閣
遲兄三月國子先生爾時儼作京貴片氈甚熱不似李生寂守山

城逢人低項操筆舌以短長我者紛紛譬如一塊土十數人攬而
稱之豈得銖兩不移且有委弃破碎之懼矣今三年報滿擬邀一
綸爲兩親榮而長安書問例須襯金官中如水年年航米來食家
嚴又許賣田以供費使鄉里小兒聞之直掩口大噓耳聞兄署篆
時清愛盈頌譬如如來雖飢見肉不食應知一片雪心入火不消
吾輩本等素骨不足驕語又如貧家子相對刺刺不休不可入富
家翁之耳兄覽此定發一笑也先帝升遐聖明新政令人悲喜交
集兄此行日日見好光景要且理會經世之務淵然其思穆乎其
容朗然其識一轉而部再轉而銓眞吾仲雪得意行道時矣

又
秋初奴還曾寄一函不審入宅報中否千里之外尺幅不傳則眞
如隔世人矣魚雁有緣不可錯過今者纔夢兄爲一上官所答相
對懊恨吾慰勉送兄官衙劇談而散覺來撫枕大笑俗占以打爲
祥當無然乎兄固才高未令世人欲殺何勞區區作此夢乎又可

一笑也正屬思焦有嘉民問津者乃以迎新司李來遂付一緘倉卒不能整理思緒但寫一夢而已詎知此書之非夢乎弟近與商人作緣蓋湖口之關怨聲如沸近更始于星渚立法之初爲兩臺所迫勉任兩月批單放舟絕不見阿堵之面以納銀悉屬府公收驗也弟以此雖勞而甚淨亦且暮脫肩恐兄聞之謂居穢地則弟愧死無以見兄矣近頗窮山中之遊稍稍理詩腸衙中有白酒紫蟹家君行迎至矣仲雪謂此三事豈不既適乎東事孔棘吾輩捐俸小耳杞人之憂未知血灑何地覽觀楊李之局敗乃公事執筆浩歎而已

與蕭伯玉

五年積想一日深談爾時不啻棗甜到今則橄欖回味時也年兄以飛天仙遊行下界天假清緣暫理幽事弟何宿因獲至于此每憶園林蕭靜荷竹芬芳兩人徙倚溪邊白鱗驚跳伸喉剖膈口到意生太白云幽賞未已高談轉清真可不愧斯語兩日讀鍾詩意

言都斷尋味風雅吐茹喉間竟不能著一字乃知前刻孟浪應付祖龍然鳥語蟲吟騷人不廢年兄幸以微詞導之使得時一展對以領略妙趣觸發天機則受益者正不在區區哦詠儻世法爲縛飾譽相蒙絕非弟之所望于年兄年兄亦豈以此待弟哉脫稿後乞畱附藁年兄爲懇烹鮮治脯大費庖人坐有子由茂先見所未見皆非楮墨所能展陳子奇文弟尤服其商均一義台見謂然乎并及

與黃贊伯

惘惘可憐有離別色昔人以爲兒女態向者別吾贊伯時兩眼與行舟相牽毫無丈夫氣也別後兄鼻息夢想舉體聖賢而弟一行作吏發想便入姦民猾胥之腹矣驕語廬山尚未識面妄欲握管拔人士之秀而進士寥寥荒草蔓塞向使入其隊中不愧作夜郎王也呵呵名篇幾許下帷何方郎君度安好蕭然冰署聊有白雲不堪持贈也願吾贊伯落筆時骨肉相傳機韻兼行方圓無跡秋

風得意揚帆而顧我于匡山之足以爲快耳
與何季穆

別兄三年不寄一紙弟之懶慢兄久知之人生聚散澹若飄雲知
己心期皎如白石卽兒女子寒暄十年不道亦何足訝也吳山江
畔行跡如絲新朋若舊友悠悠想見邇來意色名亦不可以多
取物亦不可以多羣息影銷聲時至事起弟非聞道者而知己之
前離索之久聊以狂言供一唾耳匡城山水人所豔稱俗吏以簿
書車馬混之勉強學詩說文洗滌不盡偶錄一二兼所鐫帙見弟
官況如此涉世實難孤懷寂寂兄必有以教我社中諸兄弟間坐
時略一道李生寤想之私

與繆西谿姑丈

東事孔棘每接一報心膽俱墮以講時局心腸作兵家酬應搜括
已盡敗書相踵姑丈居山憂國當聞雞而起矣一邱一壑云乎相
局已開不知于時局云何夢夢中尚希詳示但以野人之議方今

伸眉吐舌卽羣而麾之頃有從都中還者聞主眷故相并器少宗
伯雖傳疑也台意謂然否熊壇石曾一相晤今已赴新任用世之
才意色殊不寂寂渠謂翰林家食天子不得臣諸侯不得友直須
一夢以俟天曉耳良亦快論也

又

向聞台旌北指計爾時已視草北門陳謨講幄荒城賤吏仰望仙
班不知何年得侍色笑也時事休明公議交曾見此殊有生色姑
丈二十年來用世苦心到此須一展布然急則爲玄黃之爭平則
爲調停之套毋傷己甚前事可師更願姑丈淡然若在局外者而
尋常酬對和光同塵蓋清靜閉門自是貴衙門捷取譽望之法昔
人規蘇長公官非御史好譏人過似可味也愚闇無知輒恃骨肉
之愛狂言至此亦以姑丈虛懷好善不復敢有隱匿耳某之劣狀
具在都下口碑尚乞一言掩覆使知居官之酌水自矢倖免他罪
則過了今年大計已辦得一副南刑部冰冷心腸不敢有妄想也

與貢二山

江浙各天不審風景何似兩浙多口之地貴治更有伺隙之人惟清慎爲吾輩第一妙法爲民父母朝施暮暨不似李官不上不下倚辦他人也老叔仁心爲質福澤無量本以惻怛無所不宜只在嚴整衙役每見吾鄉有催糧押單之差及汛地巡捕快手無絲毫之益而有百千之害最宜革絕大約治邑之難難于錢糧清楚事上之法先須勤銷未完一二愚見所及附備芻蕘之采諛詞套語度非高明所取故不贅陳賢嗣定已行文願觀新穎姪三年官況正如水底寒魚都未藏得半兩黃金爲他年遣嫁之具應不免如吳隱之使婢牽犬賣矣可發一笑冬初覲行過里則姪亦將借較事以還暫偷數日閒傾倒胸臆未知爾時又作何光景西江出門波浪接天區區李局亦似渡至中流安能徼風伯之靈便得到岸乎幸有以教之

答張誰譽

行爲遠別不得作十日飲傾倒積懷正緣日在忙冗中佐吏行徑甚自笑也承老年伯賜之佳韻而年丈更惠妙句以榮其行時一展誦文心山色在我襟寸間矣彼中山水之勝雖足助發文章此自名人慧緣所合弟之鄙質簿書之不能了何以副年丈至意哉若得好完此局五年後晤年丈于玉堂金馬之門爾時從容領會定得進我數級耳

與吳巒穉業師

纔離絳帳輒事刑家書生妄以意行不免爲老吏所笑然奉教有日守此素心卽弱骨疏手未能孤立奇標而屈三尺以媚人將清議繩其後也今受事伊始強半高臥所煩慮者吏籍高下叢責府疑則學力不堅深用惴惴老師何以發其蒙而通其識乎茫茫度日古人杳然晤對匡山尚屬夢遊誤入吏局正恐侵尋俗我心肺如何如何遙想玄解日開宗風益暢文韻與惠泉爭芳也何患寶氣之不騰哉適具敘稿爲何老師賀而拙于摹古猶然帖括蹊徑

耳幸老師引繩而削之

又

不通問左右者又不知幾月日矣俗吏眉眼都穢神骨欲頽每清
夜思之無以對有道甚懼甚懼只有心肺如冰故業在口毫無益
于此方人士近又增一種凄凉度日光景身心了無安著處夫熱
則逢世靜則善身今兩無所取恐不材之木匠石弃之欲再望喝
棒之教難矣哉老師邇來動定家兄時寫述甚詳故曠隔雖久如
立絳帳之前今秋風在眼真老師剖璞時矣此道即暫有通塞至
理窮數極神光定為透映碧眼胡人知己持價以待奚所復憂新
刻陸離切冀賜觀凡有塵尾之餘尤希錄示將以俚語災木求一
言之重而稿錄未竟敬先以為請二先生久弗布候併致耿耿
與憨山釋

弗叩玄關者更寒暑矣相去咫尺地可望而不可即信塵劫中法
緣自有限耶講堂既闢佛子來歸具諗宗風旁豈法體康和而星

渚無量眾生咸借慈悲願力破除煩惱僕之受福亦復不可思議
也歲行盡矣寒衙風色蕭蕭舉體霜氣知山中冷寂亦復爾爾聊
采溪毛不足供鉢盂一粒也幸勿以盜泉吐之

又

寒鐘冷衲雪掩山門遙想禪關如在雲際郡衙冰氣漏雪滿牀亦
復有蕭然之致再來上乘諸品挑燈夜誦冷入心脾東遊集向未
拜賜便欲竊為私寶盜機偶發大師何以降伏之餘即轉呈兵使
者別諭星令業已讚歎皈依譬如洪鐘之鳴聾亦須覺況聞根未
斷者乎

答門人傅惕菴

荒谷寒松僅堪措大一席而兄以青霄之翮息影于中夜燈哦吟
蕭靜沈摯不佞心實嘉歎以此篤信淡緣不敢塵覆兄真吾師乎
吾何所足師哉別來鹿羣如故趣味猶新寤想大雅不能已于懷
忽接手訊兼得佳句紛披鏗然金石春色滿函然獎溢其實毋乃

非道義之雅文其附往二帙併書鄙句扇頭以供噴飯令弟英姿
定有奇進張太翁一函命使者轉達可也

答門人張憲卿

披覽日記淵乎有道之言使僕受益不少意將刪擇精微商略一
二爲簿書所奪尚有俟也近義正投渴懷徐當補入文其今集已
就先以呈覽摘長飾瑕微有苦心未審有當高明之見否向示佳
稿半已入集謬效切磋附歸記室儻以爲攻玉之助亦大雅之所
不廢也

答門人畢叔美

山中彥會耿耿不忘努力前修毋畫故步讀近義雲行水飛然須
傑采高言使觀者神動大要在前半翦插得力不輕落墨耳

答門人饒得渭

區區眼想不擬兄以第二人今荆山未剖連城之價故在也磨厲
以須轉眼卽是詎足介介乎侍綵宮下不特趨庭教禮而經緯之

奇兵刑之大持世泄官之心法無非教也無非學也親朋塵務聲

色諸緣一切埽斷文心學力知數朋所得勝讀十年書矣不佞局

守山城碌碌如故近以刑書之暇僭主白鹿之盟時入空山語文

造士結習所觸亦復有喜惜不得韻士如吾得渭者以領林壑之

秀而發高山之音耳

與門人但夢倩

終南藏隱乃爲仕宦之捷徑心有喧寂境無彼此獨至送迎酬答

洵如兄言若較閱輪任卽遂曠懷幽居母容避也穆生設醴姑爲

兄別懸一榻其猛思進修以副所期

答門人廉敬侯

遠道歸心乃爲不佞停帆論故意何殷也蠡水未烹別緒空繞忽
辱翰貺之臨矣此道儘有耿耿正須尊酒細論總不出清心實力
以窮其奧近義標令讀之意開塵事相煎無暇尋味俟他日歸記
室耳

又
闕想芳蹤雲樹渺隔鹿羣呼應念我同心此道中雖復津津不得
慧業文人終成浪語耳有約來此是所欣望名篇種種讀之神骨
俱清也

答門人丁潤生

小築傍石焚香棲靜想見風味異人僕于斯興復不淺而市塵撲
面吏局驚心息黥補劓便思挂冠正未料世緣若何耳邇于秀才
寸管相親丹鉛不斷白鹿有茸行以飽四方之目恨佳文無幾矻
矻窮搜擬走疏募名文而芳訊遠臨新語見惠聞政自道諸篇空
靈絕世雖讚譏不少畱以登梨不得歸記室也黃生是雋才撮其
佳者併鑄若老其骨力未可量也兄又如列子御風而題順取逆
題平取徑題柔取剛儻亦一說乎參之以報

與蔡孝來母舅

吏局塵劫貧勞相煎大士慈憫乃現宰官身而為設法儻亦宿有

淨因乎然非母舅布施功德則大士安肯舍旃檀佛國而入冰雪
鼠蝨之地耶秋初以關政更始清釐蠹穢為兩臺強任兩月規制
一定即已謝卻矣慈航稍濟淨瓶中初無一物不知者以為吏藪
未易說此清風話也

與繆采星

別且百日矣悠悠懷思正不作尋常離別之感念投足世途口波
影燄欲如往日吾兩人指心相矢信口相商懷必竭而語必吐豈
可得哉今所寄望者當此名人颯飛志士騁足之日采星沈其氣
銳其思清其神為必得之計而茫茫擾擾忽作忽輟者非計也然
慧心妙手得此無難而兄亦會為弟憂乎弟受事兩月亦稍試之
矣情偽有口可稽刑名有律可案關防有手可操惟是居上下之
間入疑怨之叢費手煩心耳夫事所兩難者何地不有相當于和
平則善矣客氣私情交牽互激徒滋議口弟每以此苦涉世之難
而兄亦會有所見以佐弟之愚者乎相去二千里百緒依依言之

不盡偶發一端未及寒温刺刺至于此中蕭然之况竊有素心不足道也

二

采星儼然廩生矣向來吾輩輕薄專賤廩生謂必得一段米氣在文字中今才雋少年往往得之乃知文字能如新苗吐秀便是絕等秀實可以濟飢米氣即貴價也但勿使人太倉中陳陳相因耳采星之文不患其陳而求其實如治苗者在去草毋以塵趣入心蓋米麥麻豆畢竟爲文之賊也反覆及之以發一笑此番丈教真切具見愛我山足小吏未夢見世局在心之冷熱隨緣度日所謂水到渠成若預先打點某徑可走某枝可依生平愚拙不能遠慮做官之依傍猶做秀才之鑽刺聞之亦覺可喜著手正自不會亦付之命而已所見局中倏熱倏冷者豈非費盡心機竟爾同中忽異吾意中真將局字付之行雲流水之間矣如今但日句某詞訟日平某疑獄奔走迎謁以爲功課卽文章詩句一筆久荒平生曠

俗吏而今反似忽忽成一真俗吏又可發兄一笑也教我省刑弟之刑正太省耳所不可省者衙役及屬縣之衙役此外鄉間呆漢實未輕搭一板只無聰察妙法采星何以教之

三


采星邇無書見寄然知近狀甚悉大約秀才喫米必富出門靜學則文必奇超脫于爭利之場則行必粹而得于親和于兄弟慎于納交則吾輩第一流事盡此矣采星一一得之故人千里甚慰甚慰雖然有言采星入詩社屢以罰金代文者毋乃以塵務奪其文心歟有言采星見怒于兩兄者毋乃舌爲祟而氣未柔歟吾與采星友則吾第規吾采星而未暇問曲直之所在也采星其有以復我其以近義示我雖然文屢索而不應必謂吾朋友寫書問起居稱尊作之套也而弟之意切欲觀兄近詣之所至非進賢冠人論文之習氣也

與貢說茲


得文采芹之報不覺躍然起舞逸才超韻青紫袖中區區發軔之初卽不足爲文賀然旣已發軔則千里具在目前非登峰造極殆無半途駐足處故弟常謂秀才如一級樓梯若拾級而上便手捫星辰若一退轉不免墮足樓下此一級雖非止境而不先此一級終無上進之階丈之所挾者不小願從此而益勵之凡今之秀才有二病弱者求田問舍息雞飼豚其多才有力者高揖丞尉之衙雄踞刀筆之位夫明哲保身君子所貴秀才家保守身家不過鍵戶研思絕足匪類出則鮮譽奕奕人以隻眼待之外患內訌自然消泯若夫太剛則折卽仕途且然安見區區青衿可以傲鄉里而抗長吏乎修名立德丈于是乎始故效忠告之義幸毋罪狂直

二
手教諄懇如晤芝宇來歲下帷何方孰師孰友亦有如弟之狂瞽藥石相規者否承教佳篇妄爲評擬大率才逸須範之以矩氣爽須出之以沈語清須和之以采若眼前理眼前景眼前語偶一點

綴固自可人如此到底亦復無味非弟託在骨肉之愛不妄陳此言也弟邇主鹿洞八股相親時于此中得少佳趣偶拈南人題以供噴飯



落落齋遺集卷八



落落齋遺集卷九

家書

官西臺寄父親一

癸亥十月

誥敕文乃求成茲予者二十七日始到二十九日用寶兩親懿美
此番文中略詳一二而文韻未為鏗鏘儻邀聖恩再得進封則文
義俱可益進也男初入衙門先有一疏以稿呈覽其餘尚有續稿
稍遲數日再發耳皇上祖朝講學寒暑不廢自是清明之象初一
日太廟之祭男以監禮近炙天顏亦生平一快所為隱憂者內臣
漸漸弄權然尚未敢肆行猶畏正人之議關上幸而無事毛文龍
海上頗有牽制之功近見熊壇石公祖之疏欲聚兵君山為陳鼎
相劫獄幸而就擒則真吾鄉之幸也

二 甲子正月

接父親十二月初二日之字詳聞近來一家安好甚為欣慰總之
身輕體健心安意適自家無缺陷拂逆之事即是真受用若他家

之胡亂不經自作自受只消冷眼看之儘不必介介於心從來門
戶中人品正自不同不可因一人而疑眾人試看鄒南皋顧涇陽
孫淇澳諸君子皆父親所心敬而皆為浙黨所嫉則浙黨之邪不
可從人明矣立朝居身品識為重走小人之路為功名之計豈父
親嚮慕賢哲之心況功名各有定數不關人力容容默默心實不
甘只為上有兩親恐貽憂念故每至內廷觸忌之言尚隱忍不發
不然卽一言罹禍勝于碌碌做大官也新春又上一疏長安傳誦
惟疏未有逸遊之戒一語內監大嚷與葉相公說要票旨切責如
何教皇爺燈也不要看相公云他疏內也沒這話以此遂止而票
旨云詞多汎漫以解之其實相公亦不喜者以執紼之巡撫乃是
陳瑞為相公座師之父也然亦不必照管只公論稱快足矣

三三月

初十日寄一字歸十一日卽得父親正月廿六之字但駁王永光
疏歲底卽已寄歸何以此時尚未到也今將其辯本鈔上頃又出

一疏為百姓之害一言以警省州縣官大約多切于吾鄉惟舊糧
奉有議免之旨若得行之頗亦有益正在此爭他必覆也關上無
他警報聖上疾已萬安十九日御門矣惟起居不慎好馳馬此為
可憂將具一疏委婉言之總之除了做本別無功課若本科之事
固不多也

四三月

本月廿一日見南倉院萬論劉父母之疏劉父母操守甚好錢糧
亦清只其自謂有才信人太過致七知縣之謠實亦自取以此見
父親不輕入城之高也今其起身想已在卽父親須到縣一送以
存厚道頃上一保身修省之疏幾觸聖怒然見者皆以此疏為佳
且疏上後廿六日早朝便不聞內操銃礮之聲或亦有采納之意
也北邊一帶得雨人心少安關上亦甚平靜適蔣尊陽家人還附
此問二親平安併寄近疏呈覽

五五月

張二無到接父親三月廿五之字知兩親康健甚快于心又聞五弟病已愈大哥又得田百畝了其數年之願皆可喜事男在此終日混過只是南康光景近上一請停立枷疏長安人頗頌之又一申明憲紀疏乃代堂翁屬草者併寄呈覽吾邑尊不知幾時有人邑尊不必其相知反省口舌即如劉中公之煩言吾家獨不沾著可見父親居鄉之得法凡鄉間事京師最易傳聞也多說人情多得銀子男頗不放慕家中只宜清貧況從前得父親泥補幸已不貧耶

六六月

京中景況前字略悉日來皇子女相繼而夭魏璫乘皇上之哀而激之怒遂杖萬元白年兄又以責中官之故欲杖北城林心弘林聞之而走匿大為言路短氣合已五日杳無蹤影昨代堂翁具一疏稿寄覽如今將危言極論恐聖怒不測傷兩親之心否則緘口無顏即舍大事而撫拾瑣屑以塞責尤無顏也傳檄疏長安共棄

以其通內認魏璫用事之人傳繼教為兄弟故也名義至重豈可走此路耶又欲日日做好官又欲矯矯名節天下無此兩便宜之理寧不做官尚有清議之榮使男居家三十年侍兩親萊綵甚是快事不怕東林之敗且亦不敗也

七六月

都中議論紛紛權璫作惡昨副堂楊大洪具疏參之喧傳為之紙貴男與魏廓園許霞城諸兄弟先具疏助之已甘削籍歸侍二親今幸邀主上寬恩然從此遇事不得不言言則一官置之度外每與大房大哥言出者為父歸亦為母若為自家功名則無所不可獨不能容容默默作寒蟬結舌之言官以為父親羞耳此後魏璫尋事不可知如見斥則買舟以歸又親勿以失官為不快也聞吾鄉水大甚好然聞頗壞麥須以寬減貧佃之租少減無用食口為第一義楊大洪疏併男疏附覽此後又有兩衙門十餘疏多不可盡容續鈔寄

八七月

家鄉大水便有荒年景象又聞人言明歲主旱則凡事須爲節縮之計以寬租周急活人爲本此父親百歲無疆之福根加意行之可也改折事公疏公揭男與許霞城竭力以爭顧相公殊無短長總之竭筆舌之力必可得折大半但天倉空虛之極不能如三十九年停徵耳

九月

接父親字云以木斧之聲爲笙歌演戲之名爲佐酒光景甚佳自是適意過日法人生行樂亦務保身酒後嘗須留意前以聖躬違和上疏規諫亦是此意然人多不敢言恐觸聖怒今幸未遭譴責然反之此身所以告君父者未必能體之于己父親當爲一笑也地方此番平靜雖大哥不售知父親且喜眼前清淨男甚以此放心所謂以大君子之度涵之者只如此平平扯去卽見父親大君子之度矣夏間攻魏璫時勢可畏然名義所在不敢後人今內外

反覺相安亦竟沒人提起矣水災改折費盡口舌而按臺勘疏不到殊爲可怪若見楊蘧初可一促之將有北學差只苦不能歸三四年不見兩親此心安能過得以此躊躇未定也

十一月

自發前字後每日懸懸十夜有四五夜夢在膝前以此卜歸期不遠矣璫發方張日日以中旨處人旣已逐家宰總憲去又削副院僉院之籍至陳中素溫厚和平初無得罪而以會推不如魏廣微之意亦削其籍小臣中如魏廓園夏繩北張浮西沈炎洲許霞城袁熙字房海客鄒匪石降謫者已十餘人而又切責韓朱二閣下將逐之去父親謂如此世界尚可做官否雖緘口不言以避禍亦必不可久也男此番出來改邀封典少遂人子之心做得一二十疏少吐讀書之志歸來侍養左右盡家庭之樂亦愈于孤身萬里煩二親之懸念也往惟劉瑾時有此亂政以理度之不過一二年雖降謫以歸名節自在父親且先算定此景毋以臨時介介也近

來書帕斷絕皆趙儕老高景老魏廓園數人力行禁止之力而清苦之節反蒙譴逐然後知廉吏不可爲也改折得三分之一力已竭矣且幾以此爲北人所中甚是可怪歸期不遠先此寄訊

十一 乙丑正月

瞿通到得兩親動定甚悉父親瘡尚未愈所喜精神健旺男向以多言觸忌至貽兩親憂念甚自悔之今真緘口矣緘口者非男一人己也魏閣奸狠必貽禍社稷男參之故自有見非爲朋友也卽孫愷陽老師萬苦千辛而彼尚欲爲秦檜待岳武穆之法況其他乎東林雖衰大段自不差只人有賢否不同耳志文欲得趙作亦易然彼方在憂危中須遲之鄒南老已作古人甚可歎也男已辭了學差將以避北人之鋒二月初有年例之關正亦不妨到外邊避之若過了年例萬一無事卽有差歸以告病卜之不吉而養又說不得終也

十二 正月

今歲考察亦平正無甚怪異二月年例渠輩方欲見及所同擬者則同衙門爲黃白安劉文石蔣澤壘省中爲劉養衷而選君謝不肯順從已堅意乞歸矣冢宰亦持公平之論總以安心聽之歸家有膝下之樂卽使去做參議僉事儘可自見父親莫以此介意既做言官怕不得生死況官之內外乎此亦不爲貽親憂只做小人做貪官乃爲辱親耳故男頗心中泰然而姑夫意氣消索男竊自謂過之以此發父親一晒父親得毋謂兒子癡乎

十三 二月

廿二日已寄一字今以廿七日發男婦數人回兒見時事日非將有大獄而男爲彼人所忌雖不顯然外處定尋一端以中旨處之凡侍班等項步步可以獲罪儻有差出去差上本章字字可以橫批觀近日魏元白李心白之處可見矣且差敘已定而經歷司河南道人趙起色斯舉矣男何爲依依求之故決意以思親成疾爲題總之十日內不註差斷無坐守之理所憂者非一身之得失

只恐父親以此介以官爲世法所重而反以家庭聚樂爲輕耳若因此不快而怒氣相干則男之罪通于天然自古亦不見有日做官之孝子也但愧不成人品有玷父親之教而父親向所鍾愛于男定不以團聚之樂易此官且官未嘗不在也名亦不俗偶因鬱鬱備寫此語以告父親若在此則無人可語故每日不出門真以日爲歲也

十四 三月

廿七發家小回卽具呈告病外魏云若年例就便宜了他正擬拌在告病疏削籍而初一日遂有曹欽程之疏其中主使有人次早內中卽傳出一篇旨意相公但鈔謄而已免杖而生還于心快然且旨意但以薦高景逸坐罪則正受之不足爲累者只至追奪誥命不覺爲之心碎豈意不孝之罪累及兩親至此不可以爲子不可以爲臣恨不捐軀碎骨以贖之耳嗟乎男不貪不酷何罪至此從來黨禍不過一身受之而今以奪誥爲輕典若周來玉黃白安

張藐姑等九人彼豈曾得罪于南樂而亦遭此然則男之有此亦非特去冬一疏之故也昔范滂之母以李杜齊名爲快父親定復過之公論自明局亦必變誥命亦當終在兩親俱方壯年目前何足介介譬如男爲萬元白之續亦莫可奈何今尚邀寬大之恩得菽水承歡于願足矣明日辭朝卽行先寄此以慰兩親懸懸

官南康寄伯父

父親到家兩月矣遙想家中樂事或醉雪以歌詩或傳杯而爆竹一家團聚手足歡然當不禁其頤之解而興之酣姪每逢斯節冰署蕭然雖復笑于母親之前而他鄉遊子黯然興思歲月悠悠一官繫足不知何日得侍伯父之側開襟一笑也伯父所望于姪者守官砥行勉立功名姪自分疏拙平平無奇所不敢負伯父之教者素心不染寬政近民苟可自盡三思以行吾才之短而識之昏則亦無可奈何未能博赫赫名以爲門戶光也受事三月刑名出入亦略可稽四方問遺僅入空函耳地方簡僻事務差少衙役較

吾鄉稍斂百姓刁悍則過之人士荒陋多不成章文采載籍甚寥寥也白鹿洞學者甚衆舊有洞志今正擬較修適有諸生但宗臯以傳稿相示附覽亦具此中往事一重公案耳

二
人來得伯父手書如侍左右也憂國憂民皆字字確論國之憂則居官者之憂也叩關無路每見邸報輒欲投箸而起吾鄉雖幸不饑淮揚閩浙之間饑處正自不少姪居湖城爲西江門戶僞漢之後聞蠢蠢生心憂方大耳伯父家事自有大哥可任實不必憂來字云明年閉戶不見客閉心不御事是無上妙法第恐有意閉之則根株不斷并所謂反身自處者亦尚多一執著聖賢學問自求寡過卻不從人起見其所云反求諸己必先有行有不得之處而三自反之法在橫逆之來此只處變法耳尋常見己之非不見人之非物來順應無適無莫未便說反身自咎也伯父第掃卻外緣從家常茶飯父子兄弟朋友親戚之間觀無我無人之妙得不憂

不懼之心租收客禮大哥任之童僕諄語不入于耳順逆之餘氣悉化于和儻亦學問之得力晚年之佳境也何必自咎哉因伯父言及故敢以初學之說廣伯父不罪狂瞽也官中別無他況但貧閒耳家貧官亦貧殆亦命矣姪初能安命卽今年之俸捐之以助遼餉使父親在家苦撐故以此不安于心耳

三

前父親歸因貪頃刻侍色笑故家中問候之書一概未寫卽伯父亦缺數行但時詠味示詩愧不能步一韻以仰答伯父提望之意教以勿喜敢不常存此心若云無攻尚見有人惡在夫無攻之旨原自渺茫聖賢只于自攻中見得無攻卻不于人惡上論無攻也故願伯父不見人有惡但見人有善旣見人有善則自致無致當下俱了矣書案之側聞得女史致足樂也宗譜之修尚有意乎亦不朽之業在一家者也

官西臺寄伯父一

久未具一字問起居祇緣郵人急發忙中錯過每于大哥口得福履之詳亦仰知伯父所責望有在非區區寒溫之字也憶居家時聆伯父之教必以敢言直諫爲先若默默取容循資積俸以博好官知非男子鬚眉之氣然循省往事言雖不差而未免傷渾厚之意當是名根未斷學力尚疏耳伯父何以教之時事翻覆中璫爲政日日出中旨以驅逐大臣而不問事之是非人之賢不肖聖明孤立于上寄威福于左右而已如此光景正見幾高蹈之時况姪之見憎中璫者乎頃一疏觸權臣之怒幾于不免賴聖德優容止于奪俸今決計乞歸矣只冬間不便舟行以此遲遲姑待歸來奉二親菽水慰倚閭之望且以其暇侍色笑從事于讀書明理儻將來猶可少進一籌也功名有數不須計較至斤斤守清白二字則真可歸對伯父無所抱愧大哥意欲于明春借差歸亦是上策伯父已完禮記之業否

二

瞿通來得伯父手書快然如見面也老而好學孜孜不倦而精力時境又適足以相副卽是天之逸我以老人生實受用好光景也姪以驚言觸忌人俱以禍患代爲之憂而姪付之度外近又以年例相嚇而姪亦安之分內昔嘉隆以前臺省資望深隆乃補方面方面何負于我而介介哉矧信心信理得罪于權璫權相儘有地步乃同事之人有急而改頭換面者有急而暮夜入室長跪求免者卑鄙乃至于此因思汪西君子坦蕩蕩題只是君子知命小人長戚戚乃是行險僥倖耳近來胸中進此一步學問伯父以爲何如康孫出花已愈亦可慰伯父遠念大哥歸可一年過伯父壽誕又可圖得覃恩之典皆家庭樂事姪以三月中到家恩恩附此官西臺寄大兄一

別來一月餘思之耿耿兄嫂安寧子女平好想都不必言聞考期在卽則兄且忙于料理須靜以養之使文氣鬯而字句斬卽是穩著蓋朱衣所點頭者不在巧秀波瀾也學使者以持公而人情不

宜都下嘖嘖謂其顛倒弟頗爲解之然以此知考案之難不審松常稍通融否道府縣想定爲兄畱意五弟文思何如其機澀不見聰明發露則真不若姑聽自然以待異日錄遺未遲莫謂吾之不急于噪其名也此中度日都是客席擾擾唯日進城上衙門理知縣之事爲小小功課而已旬日之內得兩皇子而中宮者天豈非天數今既得皇二子則諸大老又爲蔭階想亦有以下逮貧民也三六九入朝頗習五更早起今天寒雪霜皮骨不耐信不如在家之樂而老者委頓譏彈苦死不去真可笑也弟文茸中課士諸義乞鈔出寄來趙儕鶴一見極歎服弟時文謂公伯寮一義渠自爲之終不能及故欲索其一序再刻舊稿亦見獵之意也

二
新歲曾寄一字想已到矣續見考案是非錯出總之多費一考不必以科舉爲慮但五弟竟至四等恐傷其銳往之氣然亦可激發其精進之志邇來光景何似文章機趣如何弟新歲口碎數日卻

出得一疏頗暢所欲言其高啟愚乃出舜亦以命禹題媚江陵者顧相公乃其門生爲之出力故其子來辯復而弟直言之公論共以爲快言官之職固不得照管情面也

三
虞山讀書定有得處料理經題大半卽入闈易爲力也文章固欲靈動亦不可類于遊絲固欲清秀亦不可類于春冰須有斬然之力卓然之詞乃爲入殼之技時文重滯之語亦有可化臭腐爲神奇者要在心手了快而已治家之事勢難擺脫然急之亦無他法上之不能得請于父親下之不能生財于耕織卽使閔閔皇皇父親亦予半百之田安見遂寬然有餘哉田者虛名也他家儻來則易父親刻苦經營故難難于得故不輕爲予父親非不念兄之貧而不卽慨然者意蓋在此且使兄斤斤尺寸毋越步也雖然若以世俗不肖專一橫行者言之兄豈不可稍自脂潤今守父親之訓自守如此則弟宜有以濟兄而弟無多餘也至嫁女之費父親在

上弟在下可爲兄助不必憂煎弟已有本科之差前題差本想已見之明歲或可得學差但以不得歸家恐傷兩親之心尚躊躇未決耳

四 前有字寄歸併道府各書想已到矣五弟自云斷不考故不之及不可以此爲快快此中近來以魏廓園爲傅雲中所攻至陷汪士光于詔獄大爲公論所譁然猶以傅是江西人故大家要調停而傅則盛有通內之名大是無色蓋以魏監大恨王安傅以此語中其所喜故也江西人近爲正人所譏只是章魯齋陳帖月傅雲中三人爲之而章陳尤可惜尚未知結局何似長安中風波易起動我歸來之想擬俟差滿請告歸見二親不知得遂願否每上一疏卽打點觸怒前上一請停立枷疏而魏瑞大怒蓋彼借此立威凡死枷下者兩年來六七十人矣今欲出一疏而議論未定又割絕不得江西人正是難處然廓園吾石交其人品之清介真吾目中

所少只少褊耳而阮圓海至以爭吏垣之故與左魏大怨人言其通內事至不可聞誠出意外不忍言也朋友之間固甚難哉偶然及此姑且祕之

五

徐成來得手書時一展讀卽爲遣懷然兄所見屬者皆兩次已寄回之書想邇時俱已到考事料必無誤矣五弟不考亦復不差只望他以後勤學爲他日考地此番原無關係也嫁女之事定應待之明年女小而妝未備雖遲非過簪珠之類弟當有所備以了吾之素心總亦不煩兄念近來文思何如可寄數篇使我一觀新邑尊不見有就選者人多望吾鄉而裏足不如就他邑調之不知有俸淺而聲著者否然亦懶于問之未必得人適代之任咎但城中聞是某家所討卽事事疑某家所爲如七知縣之謗可畏也吾家居鄉甚爲得策父親更甚妙于居身也此中如沸總是王振劉瑾時景象不如挂冠而歸不意當吾世而時事之衰敝如此憂君

憂民正堪灑涕區區一疏何益分毫只爲言官不言便負此官是
以難耳兩次寄兩箱書歸有許多時文在內兄與五弟取之蓋亦
收拾以便不時削籍之意甚發請告之想俟八九月間再觀之
官南康寄爾承兄

知近況安適躍躍有丞簿之想兄才固所饒爲但莫到西江來作
債客耳不知此言遂行之耶抑言之也爲子爲父誦詩讀書童僕
不諱于耳酒茶不缺于瓶親故滿前禾黍滿屋此亦家常至樂也
官乎何足羨來教以渾融具感受我然弟正苦平平太無奇耳人
情相與不敢不畱心和畏兄此二字足爲居家處宗親上下之妙法兄固已
以答兄之贈者亦止此二字爲居家處宗親上下之妙法兄固已
臻其極亦偶一申言之而已

寄元朗弟

人言娶婦爲小登科吾所自試則登科之樂不如娶時也少年飛
揚飄蕩之氣又居岑寂以鬱其情若以新婚爲天上人間第一美

好之事曲房之中嫩紅纖綠熱碗紅爐老婦幼婢團團簇簇所見
無非可喜者不必見新人入羅幙也三日而驚十日而濃一月而
慣百日而目倦欲厭矣婚娶久則衣食兒女之累牽之仕宦久則
功名毀譽之念縈之故事喜新而氣乘銳新婚之時亦少年得意
文章妙境也當此際而文機不動文心不靈文氣不猛則文章進
步于是少矣弟純心靜氣文清而不采矩而不靈苦而不甘茲其
發機轉象之候慎莫錯過至于有婦以慰慈母之心以寬慈母之
勞自今有子有家青其衿以進于登科以不負慈母二十年柏舟
之苦斷機之勤者則皆自此始愚兄非戲言非貌語也賀不成禮
寒官之況人來幸以新篇見報

寄季弟

吾弟歸兩月矣作文幾何看書幾何識見筆力過前幾何考事不
遠有必得之術否夫尖穎而斷碎疏快而淺薄此則弟文之長短
略具兩言中尚早著力勿以小學子初執筆自寬也父親絕喜弟

矣稍稍以好衣爲贖夫鮮衣吾所喜何害于學第緣此紛其思慮
以來父親之贖則不加蔽裘之適體況我家只此寒風弟之衣原
不得鮮則去此求鮮之見可也意之所至發此狂言母憎饒舌

又

弟病痢喜旋愈也而瘡之苦如故童時不節其口今日受之可以
思今之所作後之所受則百凡保攝及乘時精進爲他日受用者
宜何如著力耶宗師歸矣遲一年著藍衫而遲著一日卽早脫一
日在此一年中切緊用功何至遂作買牛危語園中孤寂孤寂亦
趣城中熱鬧熱鬧可憎吾意不以入城爲是也前文每遺案上今
簡寄去此番何以無文吾近主白鹿洞闕文甚多關事已脫儘有
心腸說時文也父親字云弟少苦功夫亦無他苦看書作文尋
常功課隨緣了去無苦無甘如不看不作但在舍卻講章自己將
白文想一想要融貫得去至于作文之境吾向得力于改一篇不
好另做一篇半篇不好則改其半一句不好則改其句凡吾所刻

大半經改幾番其一筆寫就者固有之然不可強可以勉強者改
而已矣改意則悟頓進改格則局法變改句則字調新而常套去
試畱心行此當自知胸中進步也作字至濁亦宜用意使清朗則
卷子好看吾文差可吾字每自愧之弟那可不過我十倍也無以
寄歸只贈此數言耳

官西臺寄季弟

吾行後甚以弟爲念上事父親欲勤而慎敬而懇讀書欲真而銳
治家欲婉而和交友欲斂而擇四言者大約盡之所謂色難者非
獨在己之愉色婉容乃察言觀色先意而迎也文章須有沈靜把
握之力始可得飛舞動盪之機居身須有反觀簡察之心始可行
快情滿志之事夫不得轉移之法透脫之方而徒鬱鬱誰語草草
自放以聰快之才情少年之歲月浪擲以去則可惜也今年之考
須看筆興文心到否何如否則姑聽自然徐圖遺才亦可若靜想
吾前之四言功名學問在其中矣母親近來精神何似丸藥服否

弟服丸藥亦覺有效否保身固元尤第一義今少壯之人而具見衰弱之證豈非切身之憂乎酒色之害人人入其中在猛省力量防其縱志而已

赴逮後遺筆

途中寄父親

自廿八日儀真起身一路安穩百慮消遣至十五日到德州見報易轎而車稍苦傾側然亦小事也到後未知光景若何大率坐候周黃之至未必先問所苦乏銀賣田之外別無他策不可顧惜矣若家中有甚事變須使男知之不可隱諱反增疑問家中事以急推去寄田爲第一要緊使縣官知吾家消耗若云左右當糧長此太平時話所謂因虛名受實禍也家中無用之人漸漸發遣若既用之則須予以安貼不可以他怒絕之太甚又近之也母親事事費口費力家常語言亦須安慰母親一時說不出者必至鬱鬱而已大哥一路喫苦在京要藏頭斂迹亦甚難過家中瑣屑可照管

之想父親不俟男說也餘事大哥詳述此後不知尚有寫書之日否

寄內父

黨人之禍自古有之甥身遭其厄亦前生宿業儻邀天鑒得以生還則意外之事未敢必也岳父母須自寬慰并寬解內人之心教他訓誨兒子撫育庶女謹內外之防待婢妾以恩一切衣食之累家嚴素極體悉不消挂念只要曲盡孝道耳家母苦寂須如母女相依莫但如從前一見唯唯無言而已此須岳父常來教訓亦莫若從前睽隔也家中苦于泥補坐賊必不少乞命大舅轉移百金薄田猶可償莫便疑慮甥當往日竭力以爲親戚今當患難如大舅之休戚相關若先袖手旁觀情理亦復何安岳父卽以甥言告之可也途中安穩胸中百凡遣開先此寄慰

付遜之兒

吾直言買禍自分一死以報朝廷不復與汝相見故書數言以告

汝汝長成之日佩爲韋弦卽吾不死之日也汝生于官舍祖父母拱璧視汝內外親族以貴公子待汝衣鮮食甘臆喜任意驕養既慣不肯服布舊之衣不肯食粗糲之食若長而弗改必至窮餓此宜儉以惜福一也汝少所習見遊宦赫奕未見吾童生秀才時低眉下人及祖父母艱難支持之日也未見吾今日囚服就逮及獄中幽囚痛楚之狀也汝不嘗膽以思豈復有人心者哉人不可上物不可陵此宜謙以守身二也祖父母憂汝狎而忘敬汝母訓汝汝傲而弗親今吾有不測汝代吾爲子可不委曲仰體祖父母之心乎至于汝母更倚何人汝若不孝神明殛之矣此宜孝以事親三也吾居官愛名節未嘗貪取肥家今家中所存基業皆祖父母苦苦積累且吾此番銷費大半吾向有誓願兄弟三分必不多取一畝一粒汝視伯如父視寡孀如母卽有祖父母之命毫不可多取以負吾志此宜公以承家四也汝旣鮮兄弟止一庶妹當待以同胞儻嫁于中等貧家須與妝田百畝至妹母奉事吾有年

當足其衣食撥與膳田叁拾畝收租以給之內外出入謹其防閑此桑梓之義五也汝資性不鈍吾失于教訓讀書已遲汝念吾辛苦勵志勤學儻有上進之日卽先歸養若上進無望須做一讀書秀才將吾所存諸稿簡籍好好詮次此文章一脈六也吾苦生不得盡養他日俟祖父母千百歲後葬我于墓側不得遠離天啟丙寅四月十五日字付遞之

獄中寄父親

男不意一到卽審故受傷甚重幸一審卽允尚有餘生臥牀一月瘡口未平再得一月功夫也天時人事生路未絕賊得早完卽過刑部今五日一比盼望家信眼穿此中告乞旣窮束手無策又不免箠楚之苦矣在獄日則愁賦夜則苦痛只脾旺身健酒食過于往時此可慰二親懸念也父親要一切忍耐寬慰母親男以名節二字累親累兄前生宿障飲淚而已

寄父親

男在獄中只思想二親之苦故不能無再生之望今幸有機矣只愁銀不應手養素東走西奔亦已泥補千金乃知朋友之誼勝于至親也向因災異各事俱寬差可遣日今忽然緊急觸目慘傷只男與白安安存耳然且比限甚嚴兩次受三十棍白安交銀甚多男甚受相形之累大哥病了一月養素奔走甚苦併隨來諸僮之家各一看顧之

臨終寄父親

男遭此禍久已義命自安只念兩親萬苦千辛所以死不瞑目願善自寬解與范滂之母千載同傳耳時事如此田塾太平正不可必須賣產完債存來自娛一身受用之外皆虛境也作謹守規模則有餘矣母親有苦難言亦惟以寬得用度為好一歲二百畝之人不為多也大哥苦寒早有分給是望自男觀之三十餘年已作一世入矣比來惟父母兄妹刻刻在心妻子置之度外父親自安養教訓有方不必說也遊魂渺渺不忍遠離落落齋中乃棲魄之

所聞六月初三午刻

別大兄

弟已久拌一死只負兩親耳奈何奈何兄為弟喫盡辛苦付之流

水異世或得相報也四詩附覽

詩見

前兌白安銀可還之素兄之德家中報之尚乞同舟一行也

先人以丙寅三月十七日聞逮信從容拜辭祖父母縣令到門

即攜手就道絕不作兒女戀戀十九日抵郡宿吳霞舟先生齋

談笑歡酌如平時與吳先生往復談別語具載端友集中時緹

騎需索甚奢逼勒不肯開讀而闔郡士民攘臂奮呼欲逐緹騎

而甘心焉賴郡侯曾公二雲力為調護又捐俸慨助以飽緹騎

之欲得毋及于變途中與伯父聯袂偕行相對勞苦惟以不得

終養祖父母為憾蓋已知生還無望然恐有傷祖父母心故途


次獄中三次貽書猶作解慰語至四月二十日抵京羈錦衣東

司房為季叔作壙志二十三日奉旨鎮撫司究問錄柩送詔獄

許彪迎內意酷刑交加血肉淋漓慘不忍言竟誣賊四千勒限
嚴追五日一比必受棍賴遠近知交倡義捐助已遇天變停
刑得少緩須與死迨六月下旬而同事諸公相繼遇害矣先人
卽作絕筆詩四首緘付獄卒又寄祖父伯父二紙紙僅徑寸字
僅如豆紙尾書閏六月初三午刻蓋卽于是日報亡云時值炎
暑越三日始有旨領埋而肌膚毀爛幾不可識別時親其事者
惟伯父與陸君養素然死之狀與死之所終不能詳亦不忍詳
也痛哉先人一生忠國忘家孝親忘私卽臨難絕筆猶云唯父
母兄妹刻刻在心與十年未敢負朝廷之句豈非盡瘁孺慕之
念千古如生者耶至遺訓遜之唯以立身孝親與居家讀書爲
屬遜之時方穉齡呱呱在抱不知言之堪痛今日復一日音容
愈邈辰冬傷庶妹之早歿未秋痛祖父之云亡煢焉孤子樹立
無能事變時移傷懷觸目徒有王裒廢讀之慘未遂曾參養志
之義惟是吾親不死遺言卽作過庭之教而韋編未絕纂述當

在痛定之餘此遜之所爲恭睹手澤而有淚盈睫有恨填膺輒
賜九迴而寸折者也因錄遺筆而泣血謹書數語如此不孝男
遜之百拜識

落落齋遺集卷九



落落齋遺集卷十

墓志銘

處士顧公暨德配卞孺人合葬墓志銘

吾師乘蚪顧先生潛心二戴哀別注疏刻集解成一家言家大人以先世緒業命余執經門下先生之教脫凡近而遊高明情恕理遣平等一切恩怨所自位置甚高然數奇老于諸生里中兒更齟齬之頃余微幸還山將乞微言曠觀升沈生死之外先生一日語余曰人不可知天可知即天不可知吾心之天可知往者吾父終身坎壈今吾母驚此剝膚至不瞑目吾且奈何哉傳其可知者于無窮則有墓中之石在敢辱吾子余謝不敏已讀狀公夫婦俱有大過人者矧以先生之命乃女息而書之公諱桂字明卿別號省吾其先自崑山來有諱信者起家爲義任俠有聲居邑之清化鄉所謂清化顧者也信生瓊瓊生永和永和生耕雲耕雲生濟濟生續周急報怨世有烈丈夫風而續竟以是坐殺人辟縲紲者二十

年維時公以十三歲童子徒跣赴愬誓雪父冤其待訊于蘇體弱不支跌坐盤石上石陷門卒忽邏寘市舍舍中積豕成山倒爲所壓絕粒者兩日夜再愬于吳江晨起大蛇蟠枕上輒心動以爲不祥午後舟過太湖中流舵壞惡風蕩之如旋車舟人大號公仰而祝曰天乎吾悔不信枕蛇之報吾旣死如父冤何俄頃風止舟乃安他日攜一僕姑蘇歸夜行水涯忽出鬼物如小兒狀上下水樹間水飛滲溼兩人衣旣已無可奈何乃亦告以爲父愬冤之故鬼水爲之不飛公竟白父冤方弱冠好爲俠益甚引義慷慨不畏強禦雀角鼠牙之爭歷數年後已孔子曰里仁爲美公旣生其地遭是時又天與之忼直之性不能依人俛仰而里中人教衰俗薄鶴鳴在原之義蕩焉無聞或反擠而下之石始喟然歎曰人縱不能法大舜獨不能學牛弘乎乃大書忍字及度量要學牛弘于壁嗚呼公之孝足以反風格蛇感動神鬼方古孝子豈在吉扮下而與世齟齬志氣交鬱竟不及中壽以死豈非命哉卜孺人處士陶涯

公女拮据家政事孀姑趙二十六年無忤色卹外家生養死葬撫庶女如己子教子如父先生旣冠以博奕戲呼而杖之生平無疾言遽色視牛弘婦刺刺射利抑又遠矣公生嘉靖壬子某月某日卒萬曆庚戌某月某日享年五十有九孺人生嘉靖辛亥某月某日卒天啓壬戌某月某日享年七十有二公先葬于祖塋之昭穴今啟而合窆焉子主先生居長名文熊娶張氏次文熙娶朱氏次文光娶吳氏女三嫡適徐弘材庶適貢士徐某孫男八肇垣娶陶氏余從表妹也肇圻娶袁氏肇城聘陸氏文熊出肇培肇埔肇載肇挺文熙出土進文光出李子曰里巷中雞豚粟麥腐朽其骨者何可勝數夫惟血性男子靈玉母瓦其顛擠百折脫父于死至今凜有生氣而人子所以不死其親者自有千秋之業在亦非區區富貴雄豔一時已也經學榛蕪統孤盲畔後之言禮者酌水窮源問誰式穀則先生之所謂可知者意在斯乎爰繫以銘銘曰幼也錚錚父冤則鳴壯也烈烈直道而行孝友之志節俠之聲晚而善

息以忍爲經馭氣如馬返于無爭維彼德曜黽勉相成佩之以韋
佐其織耕式穀有子儒澤乃宏道之窮矣禮則已明以教薄俗視
此令名

亡弟季文壙志銘

弟名應星字季文吾父之第三子也吾李自琴川遷赤岸始祖怡
靜府君珙傳思誠公模耕隱公章守安公義戒菴公詡復菴公果
至吾父封侍御凡七世娶吾母孫封孺人生長兄應良次余次貢
氏妹次則弟又次則庶弟應會也弟生而穎秀善解人意吾父母
絕愛憐之六歲就傅過日成誦父喜曰吾夢文星生今果然十三
歲余舉于鄉十四歲余成進士是秋乞假歸弟迎于郡出所爲文
余讀之擊節酌三大觥作詩紀之是冬妹歸于貢十五歲余選南
康司理奉母以行弟甫離膝下切切有飢寒憂余曰否有兄姊在
況姊愛弟更篤貢郎說茲又與弟親愛也十六歲之秋從父兄來
官舍遊白鹿洞旋歸歸而外引旁馳精日以耗病始在膏肓間十

八歲復至南康畱半歲余以師道督之且病病已從母歸弟時干
言萬語謂官舍清寒歸則梁肉錦繡也然母性靜淡父硜硜教余
以廉余奉教惟謹光景殊岑寂余勉弟以膝下歡不可不亟圖也
十九歲之春余以考績蒙恩封父母如制是冬余自粵闈聞道歸
省弟初病瘳送余再入南康別于杭城冬暮娶婦郁氏卽諸生兆
斗之女也二十歲五月補博士弟子員余行取歸至杭城聞報有
一字泥金一杯酒卯君昨日采芹歸之句十一月余考選西臺歸
二十一歲讀書東園余以六月北上弟送至儀真是秋覃恩得改
父母今封二十二歲讀書虞山二十三歲余以黨籍罷歸弟迎于
錫山歡飲達曙蓋乙丑四月晦日也是歲弟仍從元修徐君遊于
虞閒一歸則文章德業相勸勉八月病疽爲庸醫誤投匕遂成漏
九月初同至貢妹處以病畱十月朔歸歸而病劇十二月之九日
竟死嗟乎弟視余如父雖狎不敢褻余亦以子畜之每相告戒弗
私絲粟以爲欺獨酒政觥籌互相賓主伯兄積然余兩人必殿弟

有酒過余時糾之余昏睡夜分弟侍立不去也弟文筆甚雋意以
外奪余極口繩督弟不爲忤余官司理時弟移書曰途中耳熱清
慎兩語若勤嚴二字尚在有無之間余以韋弦佩之也父望弟奢
訓誨備至母或因見請讓余與貢氏妹曲爲解釋弟必懺悔于吾
兩人前邇歲喜治生將出心力所營爲承顏順志之地規模極小
質貸甚慳余切切規助竟不及數十畝父方治曹莊爲基弟心喜
不及待也嗟乎弟于朋友親戚以歡熱爲主委曲周旋概得父風
氣志落落中無芥蒂治家井井履屐各得其任所莫逆友曰繆采
瓠生于萬曆癸卯歿于天啓乙丑年止二十有三生女三存其一
纔三歲嗟乎余及見弟之病謂弟病必不死弟竟死矣弟今春降
乩言一家大禍弟固知余死期乎弟業淺神清死後了了余且暮
死豈出弟下老子曰人之大患爲吾有身吾若無身吾有何患弟
已超然遊虛無之界一切塵腐糠粃余猶纏綿于生死之途苦惱
楚毒解脫無路則往世業緣余視弟倍之矣嗟乎余兄弟幾人而

陰陽人道之患相迫未已獨如父母何哉執筆淚淫久稽父命待
罪錦衣署中然燭以書嗟乎余且朽矣而何足以不朽吾弟乎銘
曰父母愛之以爲子兄姊愛之以爲弟死而有知兮待我于蒿里
亡妾呂氏墓志銘

呂氏蘇州之長洲人龍姐其乳名也生于萬曆甲辰七月二十三
日某時以才已之三月來歸以是年之十一月從至南康理署以
泰昌庚申之十一月十三日未時疾終于其寢以天啓辛酉之三
月遣柩還葬于赤岸祖墓之西淑慎無年良用悲歎乃太息而銘
之曰嗚呼汝之簡淡亦云縞綦汝之靜柔弗聞怒嬉汝之志潔而
性栗庶幾松柏以爲姿嗚呼薄命兮汝無怨地下之孤居而今日
傳

周室徐安人傳

徐安人者封宮允警餘周太公之配而吾師挹齋先生延儒之母
也先生居母喪之明年應昇過陽羨弔先生于廬悲傷慘悴若非

猶夫人子之痛者先生之言曰吾母劬勞聖善未食其報進一言多則勿嘗進一衣綺則弗御也憶萬曆戊己吾父之楚遊歲饑數口嗷嗷母從釜糜中瀝米一甌以哺吾兄弟自斷野菜數十莖雜米屑糝糊咽之不敢告堂上二老人也吾兄弟既授書母督老平頭治畦蒔蔬市少肉以供外傳口未嘗一嚮也以有今日而今日所為祿養者僅若此悲夫余曰先生之母賢母也不以祿養而以善養何庸悲已退而論諸戚黨之間皆曰信哉賢母是固好緩急一言解紛幾于女中彥方者也已又言其遺事二曰安人數歲時為大母李所鍾愛一日屏左右手攜一奩并鎖鑰授之數年李歿安人亟出以告金珠翡翠封識宛然既嫁室燼于火僦外家居焉同舍者舐其篋家人欲發之安人惘然曰是夫也貧奈何忍被以盜名蓋安人可謂有隱德者已或曰固也非其大者封公之父曰友樵公故為太康令以潔廉伉直忤上官意不數月解組歸無良田美宅以封殖子孫蕭然有貧寒之色顧好客日益甚屢嘗滿戶

外安人謂封公曰翁真廉吏為人子不能養而以食指累乎封公豪邁有大志落落治書館粥衣履不知問所自出仰事俯育一倚辦安人安人篝燈熒熒手自緝績買得數金以衣被舉家滃瀨堂上及封公致束脯數十挺安人曰此翁之教也亟以獻母有所私嗚呼廉之不可為久矣出則抑揄入則交謫世衰俗薄子婦或環而睨之若執券責負然而安人獨知翁為廉吏徙宜徙錫左右無方茹荼而不怨磽田敗瓦拮据支吾遺笥賸器無所析絕口不一置問安人之為婦何如也先生既弱冠取高第天子賜乘傳歸娶聲施赫然光照里門親黨過從相慰勞嘖嘖歎安人有子安人退然深念言往事淚數行下戒家人曰慎之哉毋鋤善根蓋終安人之世澣衣蔬食苾帷蕭然一室僅蔽風雨機杼率有常課且曰吾惡夫世俗之飾富貴容而忘貧賤者夫安人非能讀書知道理學浮屠因果教乃其所行事約取厚施畱不盡之意于後見大而取遠此余所謂先生可以無悲者也狀謂安人生平休咎形諸夢寐

或無心語輒有驗自其幼時大父小湫公善相人言此女法當貴太康公亦曰冢婦遠大器其後必貴已而果然其故多不可曉卒之日琅琅敘述有兩青衣童子一我冠丈夫導吾往問輿從何在神者謂吾有德當生某州作貴男子噫以安人之賢區區貴男子何足道哉而其事絕異亦不可以不志安人享年六十父曰祁門訓導啟鎰子六人備安人者從先生封而不偁母者從封公禮也外史氏曰貧富之交貴賤之際死生之變三者人之所難言也安人易簣之言曰人看生死極大直夢覺關耳安人豈所謂有道者哉甘苦一生信心不愧有能師其意通死生貴賤貧富而一之者可以任天下矣是在先生哉

蔡外大母傳

某兄弟蓋有兩外家云則吾母封孺人生于孫而育于蔡蔡母則先外大父紹湖公從姊也蔡公梅泉早世實抱余母爲女恩勤可念卽余母亦知母蔡與孫等也母蓋二十有五而稱未亡人未五

十而歿茹荼飲檠二十餘年稍見孤舅氏之成立而遽棄也嗟乎天之薄母甚哉宜乎余父母與舅氏每述往事淚簌簌下不已而家大人命某爲之傳也傳者傳也母節可傳而以年不及旌母孝可傳而非宗黨姻戚聞又不能傳也嗟乎是在某哉當梅泉公屢試屢躓不惟發憤母精心婉色代公曲事舅姑舅姑素嗃嗃不自知其顏之霽矣而一以其所爲婦者事嫡母周問遺趾相錯疾亟顛天請代見者泣下初母父龍峰公及嫡母周憐愛母特甚授館資膏火費稍豐梅泉公故好行其德母佐之推貸閭里貧乏者居久之公病以死母提乳孤數慟絕也孫有黠奴睥睨其業陰以役傾之吏呼於門盜瞰其室四顧煢煢無告諸所珍遺不知入誰氏手空券纍然在無償者或語母按券責之母曰是夫子所以周急濟虛者也死者義而生者利乎悉焚之好爲德如故有鄰婦不能舉火質衣周之居平服粗茹淡手繅織其急人之急類如此梅泉公有弟遭外家齟齬母以舅姑故嫁時裝囊多爲所侵而母自此貧

矣蓋母幼知書曉解節孝大義尤喜禪誦于清淨慈悲之旨雅有得云梅泉公與故都諫吳公爲弱冠交約爲婚吳公故貧梅泉公歿時家尚殷里中屢欲婚舅氏者母執曰豈寒死者盟卒委禽于吳後都諫顯人服母遠識母曰吾豈以爲貴故哉乙丙閒舅氏有室矣吾父亦補諸生瘁色稍開而病奪之年僅四十有六而卒語舅氏汝父歿人孤雛視汝汝幸有今日勉之哉吾行報汝父于地下嗟嗟母之生悲于死立孤而後可以死卽梅泉公之死安矣舅氏名士禎吳郡庠生以今丁巳舉一子曰錫遠吾母撫而字之示不敢忘母恩也外史氏曰觀古今所推重則節孝兩者然或享其泰或遇其屯夢夢何可問也母以二十年傷心飲血之痛謝死者地下卽長年履慶其貞心亦何豔焉惟是貞心所遺猶令人甘集蓼之苦隕汎柏之涕聲施遠矣夫計積食報是在來者

錢封公桂峰李宜人合傳

按公名受徵字文甫桂峰其號錢自武肅王後代顯于虞十一傳

爲垣坡公甸娶于王是生公宜人爲予從祖姑予李氏亦虞人國初徙居江陰之赤岸宜人父曰赤涯公詢母王氏而公與宜人並貴則以長子達道治曹治霸兩奏最至今封稱奉直大夫宜人云公聰神湛發篤嗜書弱冠以麟經遊北虞邵先生之門精研幽討補博士弟子有聲窮經三十年長公魁于鄉始謝去博士業沈酣稗史百家手自刪述矻矻自娛家少長共嗜之老博士埋首蠹魚耶宜人之嗜書乃大類公幼奉姆教通女訓而婦而母所歷貧貴忙閒之境率手一編竟日童僕嘈雜米鹽耗去或弗聞蓋其天性然也垣坡席素封故豪恣飲施屢常滿戶外一燬于倭再困于役家中廢公曰卽貧也奈何減大人歡割產供滄瀨費宜人簪珥佐之事嚴母王孺人意迎色授曲得其心二老人亦咨咨于婦孝我倭之訂也公適侍垣坡公他所王孺人及宜人先期徙去烽火翔村郭閒垣坡倉皇委頓公負之披霜露行數十里始免弟梨山爲垣坡公愛子析箸有所肥瘠公與宜人無閒言其孝友相成率此

類也長公治曹聲籍甚公切切貽書戒之曰治國者先齊其家母
他溺爲亂始旨哉言乎既兩拜命稱貴人章服在笥不數與公府
造請已爲月旦所推泄大賓席者三竟無議其後者虞之俗炎競
無雙青衣羣走田廬子女因緣門下者若若公數謝卻之曰吾有
故吾在長公再起再蹶情變勢移事多出意外人爲恠慄不平已
需補都下以喪歸公一慟輒自解曰吾猶故吾在大抵公爲人油
油自適無聲色狗馬好任運履素欣戚之遭晏如也與人交坦蕩
無城府坐無雅俗貴賤必投轄沈醉以行甚者佐其緩急無德色
宜人于福田利益之說絕弗道而慈愍具足以意布施尤篤于外
家從祖沂川公困于役往依宜人終其身室廬之衣食之親戚昆
弟貧者叩之立應其相與以德施無異意又如此宜人少公二歲
卒年八十有三又八年而公卒整衣沐浴無所疾苦若有前知云
子四人仲曰通道亦先卒啟公手足者叔季二子遵道造道皆邑
諸生而叔卽余婦翁素心質行如公與宜人者也生卒年月及諸

嫁娶具太史志中弗書李某曰聞之家大人云公與宜人雍雍穆
穆相敬如賓迄于白首盛德之風晚季所罕見予弗逮事宜人顧
見公九十時神明映徹對客不倦鬪子射覆屈其坐坐無少長皆
親之夫貧不濫貴不淫老死不亂庶幾有道者嗚呼予至今日而
益思公與宜人也

序

賀何老師奏績序

郢中何先生人倫妙天下乙卯之役不肖猥荷先生國士知奏牘
主者幾令不肖冠軍也不肖心手冷寂先生賞之聲華之外而臭
味期許又似收之堂室之間此直文章之知己乎今先生以郡李
奏三載績膺寵命甚赫不肖叩心索響何能已于言雖然華言之
以爲阿表言之以爲暱請得在民言民且無第言民而在李言李
吾郡故東南重地郡李爲激揚風勵之司臺使之倚耳目者七屬
吏之仰綱維者五外令之質成平衡者十有三郡父老子弟作苦

詠哦少他郡之囂華而鄙僂殊甚其雪沈冤削奸究定疑案上上
下下議出議入者亦惟司李寬撫之耶積而狎其柔急操之耶競
而疾其猛詩有之柔亦不茹剛亦不吐噬嗑之初九履校滅趾无
咎先生下車徐酌其察會而持之以平寬則陳君之執筆斷則杜
紘之斬姦愚吐赤強獻膽點吏洗手以歸士大夫懷牘以去一攝
守再攝令卽金矢釜鍾之羨出佐公費纖無所私蓋嘗士民頌先
生廉生明明生威是以法行而民德固也夫不肖則既居是官矣
往者受教于先生介節易執法難執法易獲上難獲上易信下難
吾誠守之而澹御之恕行之母以疑爲嘗母以恩爲市母以怨爲
歸至矣哉以所見先生酌白水自矢錮人盛世仁者不爲吏爭自
洗濯至恐一日不能三易腸而七竅使心折先生輒專簡白之啟
事者曰清真寡欲萬物不能移也且夫參眾議之衡綜互持之局
百案歸平羣品分照上官之歡心與下寮合長吏之歡心與百姓
合百姓之歡心與士大夫合獨才識具哉其淵然穆然不吐不茹

之妙不肖何足以知之知先生者郡侯劉公如蘭之臭寅恭之誼
斯又當于古人中求之矣卽日者飛霜左掖知善卷五部閒不能
久稽先生而昌言迴馬五日栖烏則先生握斗之年始下走請成
之日也先生尚終惠教俾得步趨焉以毋負國士知惓惓之私不
自知其唐突絳帳也

賀袁太府致績序

廣陵袁公來守南康三及秋而報政遵令甲也先是公以覲行臺
使者文章列公治行異等天子嘉惠匡南敕公益懋乃績三載予
將顯陟汝茲維奏最之期疆圉孔棘當事者側席思借公前箸二
三僚佐沐浴公澤有年竊慮執鞭弭日短庶幾附左右史之義申
一言攷信來茲于是郡丞王公別駕于公交以屬李子李子忘其
固陋遂執簡以從蓋今之言吏治者率拘煩簡之格斯郡也有簡
名山根湖腹之餘嚙菜披葛之俗耳食者謂太守坐嘯畫諾積資
以去此夫身不吏斯土目不習公之蒞治者也書曰若彝撫事惟

明作有功易曰通其變使民不倦又曰神而明之存乎其人今夫
富者之治室也米鹽瑣屑耕奴織婢各有主者出其桑麻之利可以
了公家之役主人翁提大綱受成而已小家則不然手卒瘠面黧
黑戴星而櫛曝日以行衣未脫于塵而牀頭之貧欲罄故其主特
瘁而其家乃隆隆有起色郡當頽弛顛逸之久痿痺而不靈閭閻
而不耀兵如塗羹也偷于巡糧如鼠穴也胥爲政訟如鳴狐也譁
而陰公殫心剖血以爲之綜核名實鉤剔隱蠹法行使民威教行
使民信僇焦舌敝諄諄乎嚴父之訓子而後乃逍遙河上者罪兜
侵影沒者罪豪猾罔上者罪攘搏湖濱者罪郡是以有清霜而未
也士土語觸文孤臆逞陋无賢遺澤榛莽塞塗公執鐸以宣之延
師以董之廟貌之弗虔則新其宮祀典之弗修則昭其義使濂溪
紫陽人人襟帶間郡是以有星漢而未也羅織之獄讞者首鼠孤
寡之痛强者焰摧公秉三尺絕不以豪有力抑單獨而數十年覆
盆沈案一筆立剖郡是以有白日而未也荒城僊子水面風浪蠡

水利源城門湮塞不復通呼吸于四方公開道以迎水脈條畫當
道洗湖關怨穿以移稅于郡門豁胷膈之鬱軫而肉塞城之枯瘠
商歌遠民呼市郡是以有雨露而未也二千石廉察屬吏嚴于吏
斯以靖于民一二巡尉豹虎食民長吏恣之奧竈主之公髮指面
赤除其殘褫其墨不以一路之哭博長厚之名郡是以知天地之
寬而寧室家之宇凡此者龐雜置之可以煩謝苟且因之可以簡
謝公獨好勞乎公于郡泊如寄客于一身之得失去來輕如秋雲
邇者清風兩袖之歌朗映空湖之月蓋胸中纖無所挂而直行其
不折不回之氣以妙運其經緯釐剔之才遂令頽弛顛逸之民終
日鼓舞而不倦公真可謂通變宜民匪區區明作之效已也以所
聞公佐開封時值温汜之爭口藩田之沸手劃其疆平質成于歲
芮身履其尾狎橫璫如嬰兒汗流不驚功百年不泯昔以簡御煩
而今以煩治簡公何有彈丸郡郡得公寧出雄都巨鎮下哉公旣
書績奏天子旦暮璽書慰勞陟公長城之寄茲二三僚吏幸猶得

庶公宇下不惟賀公亦胥自慶也敬書之爲執爵先
賀袁九滌榮遷序

寅長袁公以治行異等擢憲副滇南駐節洱海公既受命且行二
三僚佐謀祖道之辭則相與徵輿言采士議僉曰公再造我康是
宜秉憲內地不能無嘒嘒於萬里之遙也某曰否夫以萬里爲恨
者豈非爲公計便安攜妻子捆載行李期朝發夕至哉不見公之
來康乎單車蕭然妻子不之官竹籠攜書數卷直有琴鶴相隨之
趣今奉天子命察吏邊徼將爲王尊之叱馭何慮萬里哉郡丞馬
君固滇產也述其土地風物之美陰陽燥溼之和金錫寶貨之繁
以珍時和民醇過于中原則或者謂當事之善爲公地向固勞
之今乃逸之向固嗇之今乃豐之而余曰否夫厝火于積薪之上
怡怡然自以爲安者所在皆是也往者人皆持無事之議矣內自
腹裏外自九邊一切舉柔猾飾名之輩陰行以暮夜之金奧援之
力營營沓沓于其閒民之疾苦弗問而墨吏高飛兵之虛實弗問

而債帥宿飽一二剛敏任事拮据自效或已眈眈擬其後內患倖
未潰之癰遠左已爲燎原之火矣且夫不履其危者不圖其安不
窮其窟者不知其弊康非世所名僻簡者乎自公之下車也問士
之秀者琢之問吏之殘者礪之問精之蠹者清之問祀之禋者新
之問豪猾侮法者剽攘湖濱者鋤之問兵之積逸者易其壁壘而
更張之問民之疋瘠者蠲其加賦而代輸之問商民之所困阨者
徙其怨窾而築堤以捍衛之然後知康固西江之戶而積蠹之藪
也蓋天下事壞于蠱事之蠱也釀于巽公克其巽志幹其蠱壤先
庚後甲以致其丁寧先甲後庚以精其揆度而振其維新革之時
義大矣哉公可謂善用革矣滇之中他弗具論卽弄棟羅婺之閒
涵泉金沙箭竹翡翠利可以佐國計而不肖者居爲金穴其地民
夷雜處法網疏大又率借爲藏拙之鄉夷弱則憑陵之易地饒則
貪墨之多積久不釐一旦蠢動未易靜也公往矣與教化課農桑
戢姦慝皆得以便宜督率二千石以下而其大者在驅墨吏毋使

若輩豔其地爲金穴與藏拙之鄉則治滇猶治康而他日晉陟大
藩單車以旋亦猶今日之去康也天子其倚公爲長城矣何問萬
里哉張然明曰使馬如羊不以入廐使金如粟不以入懷班仲升
曰察政不得下和宜蕩佚簡易寬小過總大綱而已此二言者皆
公所饒爲某又何贅焉某終始四年受公陶鑄視馬君子君佩德
特厚故刺刺不休而深致望公之意于簡并以觴公云

贈郡丞王葆真致政序

郡丞括蒼王公敷歷二十五禩所至灼灼有聲稱顧不能委蛇時
貴僅拘常格至今官未及朞而動尊鱸之想上臺挽留甚力三載
中乞休者數矣公何急流勇退哉星渚爲彭澤故居高風拂几案
吏斯土者輒有隱心然歸田園居詩云誤落塵網中一去三十年
其三十年委蛇觀運具有苦心則羞爲五斗折腰直是英雄痛語
謂其意不在用世者猶非定論也今公他偉績置勿復道所最著
者司李楚辰監戎出入矢石閒卒蕩播孽自茲風雪呼吸吉凶之

變妙有奇鑿見挽弓躍馬勃勃有生氣兩年來匡阜屹如蠡波畫
偃無所試其奇則受命樞關關載寬大聲再理繒帛之供籍報餘
貲無所私再視篆鄖陽手如冰政如春頌民革心革面設像祠之
比于甘棠公三載政績大都治外而于軍旅之計什不得一夫前
三者人以此頌公公左宜右有施所緒餘譬之傳神者部位雖具
其神不存焉神之所鍾宜莫若治軍旅當此羽書急告英雄奮袂
之秋卽斗大匡南主者振厲率先壁壘旌旗煥然改色小者需公
贊襄大者需公提枹鼓邊徼之外而公何忍言去卽主者旋轉之
略或無須將伯之助而同堂蘭畹臭味千秋望五老以連雲酌蠡
波而交漱公又何忍言去且半世崎嶇亨途方啟一生骯髒偉志
未舒孰負奇而不庸疇鬱抱以自老公于計亦未宜去也公以一
去調伏其雄心請甚銳色甚決如魚之避餌而鳥之脫樊奮不可
止或者見公刺刺牘上外護其身內顧其子謂公丈夫也乃爲兒
女子態不知世無子期伯樂公之意遠矣老驥志在千里使御者

不用以康莊致遠而使躑躅于荆榛邱垤之間母寧其伏櫪嗟乎此公之所以決于去也雖然公行矣奇偉鬱勃之氣猶在眉宇而豈山中之人也哉儻有起而召公者乎烈士壯心未必不在馬革間揮手謝彭澤未便許同趣也于其行敬從寅翁袁公同寅于公後酌酒擊唾壺以送之而袁公復命之曰子遂書此以佐酒

壽邱龍翁年伯序

今上御宇丁在巳龍翁邱老年伯壽躋六袞有八季夏辛亥其初度也信之將馳綵稱觴同門諸兄弟謀爲壽使余修酌者之辭今祝者多支稱豪華榮顯以相豔或遠託神仙家言吐故納新餌大還而規久視此其說奚取焉佞而誕乎寧質而簡吾獨有概于伯氏父子兄弟之際也夫生之辰身之初也反本維初念生我之劬勞及其所生與吾所生者齊軌象賢之不易孝弟慈缺一焉于茲辰宜有疚心乃伯氏之奉尊人贈中憲公也無纖憾也中憲公倦家政業漸零伯氏季也年少慨肩之曰兄爲親讀吾代兄養積居

逐時權子母利供甘毳滫瀡色投意迎具得中憲公歡故仲兄少司徒公貴所至飲一杯水不煩半粒爲奉養需也人情倚父兄權分餘潤肥私橐者十九伯氏澹情砥行獨以所銖積佐貧士舉火有紛爭一言解去司徒公心推重多資商推率相成著清白聲而友于之愛倍篤伯氏斯可謂能子能弟矣身雖隱儒賈閒乎竟以子顯蓋諸兄弟敦信之才超邁淵博而信之曰此家大人之教與信之交抗爽坦素令人鄙吝俱消則共嗟重其品而信之曰此家大人之範賢哉伯氏義方遠矣吾聞子維九慈維一更有出于舜閔之父之所難乃舉觴遙祝曰伯氏其加觴乎居父子兄弟之際俯仰無忤夢寐俱甘方風和景明杖履輕適親舊道故歡笑子孫以次進酒歌南山伯氏之樂未央且今使臣受命而執掌簡書成命則從容家食與古所偶不遑將父者異信之行驅四牡攬六轡得以其暇修溫清效萊綵歡是事君事親之日兩長也天子旦暮推恩表孝弟篤行之士伯氏德潛而逾彰載膺寵光以究于大年

自茲辰端之矣請以此明諸兄弟俾觴之意

外舅斗垣錢翁暨楊孺人六十雙壽序

丁巳之元外舅斗垣翁周一甲子慶者在門翁以讀禮辭樂懸不作爵倚不飲余從家大人後升堂慰藉弗敢陳辭而退已私念之數窮于十始于一是六十年者逝波泡影夢覺之餘耳詩所謂如日方升如川方至者皆義于始而十二干相配午居中翁之祝且在午生德之所始也其冬余來官西土明年謀致辭焉會奉直指檄行部旋有論秀之役東管弗竟又明年爲未干取其義福未央婦以母楊孺人六表告余欣然而笑曰有是哉翁家世躋雙壽之慶乎聞太封翁夫婦齊眉合德永日一編驚豔新華泊焉不有卽當年歌頌之章與蠹魚俱化而雍雍肅肅太和在宇其子孫固應百世不忘也往余祝太封公神氣容澤淵靜簡貴穆乎先民之遺閒承清讌飛觴鬪子以九十老人狎小羣而不驚意得靜理多焉孔子言仁壽必本諸靜蠅趨鹿走囂然于父子兄弟之際以殘削

其育命之根卽竊息久視直桔形耳若夫體居至靜神妙自然柔以居身平以履世此何俟爭消息于寒暑引菖菝以長年而元氣不琢法固與壽合矣方培垣公貴乘而附者一呼四靡翁于斯擇便利美園宅意氣自豪者人情乎乃退守磽田短舍蕭然寒士風責子錢者履滿戶次第洗室以酬矢弗旁睨蓋面可乾唾心可告天克肖太封公夫婦而全鍾其中和之氣孺人勤敏過太夫人嬰其蕩蕩姑妯閒以溫惠爲本余每見翁方顏粹色手持大白竟夜不倦少長列于坐推梨讓棗翁歡然以和氣濟之盛德之風可樂詠也退見孺人椎布濯澣選言後發體念兒女姻戚傾筐倒篋乃已情摯而德和也且天以福澤施人如注水然盈則止敲則覆人自以其量受之常居於平而可繼之地青天白日熙熙其下必崩雲激雪之奇酣霞渴虹之麗哉翁三十年老諸生挾有一經孫枝振秀門無叫租之吏室有斗酒之儲父子兄弟式歌且舞有味乎堂之以安和名也烹鮮染指甘謝含飴選豔徵奇景輪戲綵以前

之不足者留餘于後酌之不盈取之如寄吾知太封公夫婦在
天之靈顧瞻俯仰定樂棲止斯堂以篤申翁及孺人之祐日升川
至寧有艾乎彼田舍翁擾攘刀錐輕薄兒爭雄劍擊者得失何如
也于是乎書之以爲壽

壽表姊朱室錢孺人五十序

論女德者弗貴才或曰德以順爲正才以逆爲用易戒攸遂教婦
順也或曰巧乃拙奴靜爲福祉惟淳厯惇一者其氣厚而脈亦久
長是二說者皆近于道而余以爲夫子治外婦治內酒漿麻縷之
細具可取才而特不以標表于閩外其夫子而弗自治也綱之紀
之婦焉是賴以克保有厥家既才克有家而不專不妒以從無違
夫子之訓則又百不一二觀也孺人爲予從姑之子先曾大父戒
菴府君痛伯祖任菴公爲若敖氏屬徽垣公以贅壻受產司蒸嘗
故孺人于予家不言外先世閭範所觀傲而稟成者居多光祿君
既任天之發如玉在璞孺人性敏慧一切井井光祿君遊醉鄉而

無弛政光祿君席綺麗而內有素風光祿君好客多狎治而孺人
教諸子以正伯仲恂恂文學爲退讓君子夫以女丈夫才兼其時
內家顯赫疑可挾重相驕而孺人曲迎光祿君意日羅綺筵飾寵
姬以酣夢四嫡五庶慈愛如一有鳴鳩之德焉孺人于是乎有大
過人者諸子鍾母氏之秀日新其志業以發皇母氏之德矐余故
卜孺人之福未艾也抑易有之恆其德貞婦人吉夫子凶解之者
曰夫子制義故從婦則凶今觀光祿君之家或多爨亂其聰明以
敗乃公事者道莫若從婦乃吉豈聖人之言亦有不可盡泥者歟
孺人方初壽其仲兄慕薇索祝者之辭遂授諸簡以當彤管
重修白鹿洞書院志序

白鹿書院志李崆峒先生嘗筆削之讀其敘義例可觀也今所存
者僅學博周君偉所續編而壬辰去今又三十年矣余不敏佐理
是邦奉學使者檄兼理洞事既已簡一時之秀定課程申功令謬
珍清心二語以通文章山水之趣其于學道津梁茫乎未也昔胡

平一與朱子書云時文之外別無可相啟發者余于時文猶屬侏
儒之見而況于道乎已時時洗滌垢腸參尋哲訓繙閱舊志手自
鈔錄標紫陽之疏札以原始萃先正之論說以明教殘碑逸簡頗
爲綴緝蕪牘濫詞僭從刪汰蓋韋弦之佩庶幾不忘而諸生請曰
舊刻蝕矣願梓之得卒業焉余竊惟書院之重也道也而文章山
水乘權而遞旺夫山水以淵靜開心文章以芳華澤性學道之士
不作殊觀試涵詠斯編反觀自得正襟危膝卓然示我以高山
者乎有流觴浩歌曠然坐我于春風者乎有冥心寂照悠然對我
于屋漏者乎夫教與時移學隨資化入山思靜友鹿成羣將以醫
俗息爭則斯編也豈非學道之津梁哉雖然音成空谷不免徑借
終南必有執崆峒先生之言爲余罪者

涂大司馬集序

學士家多博而寡要勞而罔功其鞅掌功名者率不能澤于道德
果兩者相躋耶抑學力之淺也昔王新建定亂持危功在社稷當

其初羽檄交馳揮塵論道論者謂其學問本原得力乃能鎮撼解
紛出奇制變稱一代偉人今大司馬涂公淵源理學叩微詣極以
修身握窾以知止提宗穆然有道君子也一撫延綏戰勝多而延
綏重再鎮宣大威令肅而宣大重十虜封貢之役他人枕戈而不
得公以坐嘯得之繕性建功一何若斯之合哉諸經畫操縱之方
具在始末疏中而幾事之密飭備之先蓋三致意焉寓燕錄不云
乎步步反本著著知先夫古人之學至于治國平天下不外一知
止後世識闇于幾先張皇于小虞往往本末逆置先後倒行緩則
姑嘗之急則曲迎之落落無可收之局而一款一戰其權總在虜
而不在我嘗讀史至宋之元昊未嘗不廢書三歎今哈密自王襄
毅封庵答亭埃不驚耕牧自便者三世矣十虜嗣封酋長內變
尋復要挾市賞增額卽五路諸部落各願治兵內援然一發而不
可戢將奈何公熟于邊計深中重發惟是覈夷情討軍實撫諸部
爲聲援彼狎其餌而我峻其防彼主于款而我主于戰視諸邊狡

虜若可折箠使桀黠之虜用是奪魄而款乃定當是時素囊之桀黠誼之不動卜石兔乘機覬覦之不動至朝人搖口飛譁旁撓之而亦不動機權在手罄控惟心靜含先天之祕動合先著之宜知止中得力若此究其用卽靖海犁庭寧非緒餘哉刻疏草若干寓燕錄榆塞稿陽和語錄隆沙證學共若干卷蓋兵戈搶攘泉石逍遙莫非止修之地莫非證止之時學者究其言得其心始知理學事功初無二諦而我明偉人至公直割新建之席也不佞叨承教緒復忝涖公鄉得諸編卒業而不能已于言敬拜手爲之敘

學政合編序

先儒言古者學而後入政未聞以政學者也今之士何所謂學憑三寸之管竊數幅之膏秀才面孔纔脫于胎而峩峩進賢民社在手未知學遑問政乎憎喜所觸情爲政左右所移耳爲政豪有力所噓勢爲政甚者貪淫所中金爲政也責三嫁之婦以閨訓問登場之盜以士心嗟乎已晚則吾願以其政學而可語曰學書紙費

學醫人費夫使人費而知學惕惕焉思其眾味之甘苦辛酸溫平補剋以迎人肺肝胃腎寒熱遞攻之變則指下脈靈心關劑合庸醫可以證聖不致終于鹵莽而殺人此亦以政學之說也學政政學吾烏知其分與合乎哉廣昌黃君深于學者也其曰精思是格姑息非仁余卽未知學而居是官筆生筆死極于三思夫思到而識虛識虛而力定力定而姑息之根乃斬斯亦學力淺深之候矣讀黃君言以自省焉并告今之從政者

禮記集解後序

李子曰禮難言矣兩戴後馬鄭王孔賈諸儒人自爲解亦旣剖玄析微而畫一不具我國初較士獨禮經宗古註疏永樂中始取陳氏集說布之學官便章句耳以醇粹之論發經義之精集說所長以正大之情破經言之滯集說所短于是言禮者率本集說或別出一家言醇疵居半義意在顯晦間則禮難言哉乃若錯綜參伍備古註之大全博攷簡收訂今言之悠謬未有如乘虬顧先生之

斯編者也蓋先生二十年苦心凡三易稿始克纂定往予受教先生先生言學禮者習其數通其意而已今若參稽不核師心悖古傳會太煩泥註晦經不可以明禮故先生于斯編融會經文詳攷典禮求合乎作者之意而竟其指歸務撮夫諸說之精而刪其蕪穢無拘集說見無反集說見支離一洗開卷朗如得斯編也禮其有畫一解乎雖然集說之傳不在集說也入元不仕陳氏已足不朽先生之傳要亦不在集解也其爲人也孝弟先生亦自足不朽往予爲敘說攷註未暢所欲言今每讀集解後覺仁人之論藹然并爲釋其經外傳心之旨

忠義經序

神之忠義懸日月威靈攝人天蓋不待經而尊亦不待家諭戶誦而教始行也洗心明眼神若臨之夢魂暗壁神若提之故佛子巫師木魚鐘磬幾徧天下而誦神之經者蓋寡非經之不傳而神之教無所事經也神之言曰日在天之上心在人之內昭昭乎天之

雷霆而聖人之木鐸不謂之十字經乎神故有籤詞而類以江東籤蒙之應若桴鼓益信夫神之靈無所不可雖然博施此經家諭戶誦其于感發忠義銷落陰邪功必有倍于災祥禍福之所求者雖以羽翼六經可也某之先尊人某虔于事神嘗刻神籤詩茲復謀刻經以行世而所得贖本訣神媚功此小夫佛巫之語正直如神宜所弗聽是經之傳其來既遠詞嚴義正可以廉頑立懦故予樂爲之言俾刻而廣之

蓮社高賢傳小引

遠公蓮社意不在蓮靈運鑿池種之以求入社此念已落色香劫中矣試問白蓮花片片欲墮時靈運淨業安在遠公麾之自是明眼雖然人相我相是非相內外相種種分別無有是處淵明攢眉迴去乃第一正法眼加速公一等也支公九際寤想宗風披尋逸韻校鐫是編開百十六人生面爲學道人津梁正使鳴琴白石月曉風清讀其傳想其人蓮花片片在我指端馥馥幽香在我鼻觀

又何必棲空林之榻躡壁中之影哉解者正作攢眉趣可也
郭學博孝友賢聲序

詩三百篇蓼莪寄志常棣興歌洋洋乎備矣乃者舞衣寢薄其豆
漸深天性之傷古今同慨廬陵郭君產孝友之鄉而沐浴乎其教
恂恂篤行縉紳先生咸俾之懿德所好發為詩歌殆非欺我君今
佐鐸匡南明倫為職夫言教之不如身教也伐柯伐柯其則不遠
諸子矜鐫其詩以興以觀試揖讓于明倫之堂問誰為吾師乎而
漠然者羞為君之弟子矣雖三百之多奚以為因其乞言書此示
之

甘棠集小引

都昌號難治同寅王公視篆數月民設象祠之比于甘棠或者驚
公速化而予曰不然苦則吐甘則茹焉人情乎往治都者用其沃
以取羨用其嚚以取賤用其梗以張武健吏實務為怨藪于民何
尤公乃卧而治之獄市不擾剜肉之痛無聞夫憔悴之後易德耳

攫之以為例則蠲之者立見恩殘之以如屠則字之者倍可喜且
不殺之心可乎禽獸不欲不取夷狄盜賊化焉而況于沐浴聲教
之民乎公之速化者德也時也公雄才傑氣深智識微生平卓犖
政績此區區者亦奚足云嗟乎公今隱矣予所以沈吟反覆于是
篇者蓋將為後之治都昌者告而借公為導師也

顧文叔詠物詩序

作詩者寫景易而詠物難景多千變之容嘗在意言夢想之別物
有一成之質須在色聲香味之中故寫景者每病于刻虛詠物者
每窮于蹊實嚴滄浪于詩有別才別趣而非讀書明理則無以極
其至斯篤論也古詩詠物三百為最東坡云詩有體物之工如桑
之未落其葉沃若他物殆不可以當此少陵諸詩善于借景寫物
因物寓景如遠鷗浮水靜輕燕受風斜可謂妙極其趣至靜字微
理尤寫出野鷗忘機之妙彼以認桃無絲葉辨杏有青枝賦紅梅
者與三家村語何異乃知賦物如寫照得其意思所在而已不在

使事配形也文叔先生高才積學敦尚風雅其詩諸體俱備而尤于詠物爲工落花之什三十眾彙之什六十善體物而不爲物所窮善使事而不爲事所使落英繽紛麗情含映卽不敢云上軼少陵其于方駕宋元有餘矣先生伯子虞工聲噪藝苑子季弟師之子故得交虞工而因得發先生帳中之祕齋頭傾釀把盞夜哦以先生百篇供予斗酒醉幾不能成步予未知詩而篤嗜如此者庶幾見先生之詩可以興可以羣可以多識如此也

爾承兄落花詩引

兩妒名花千古情淚詩人情癡往往寄想然未有如近代之效顰續貂誇多不已者予每愛唐人自是桃花貪結子錯教人恨五更風之句妙于翻案見奇詠白蓮云無情有恨何人見月曉風清欲墮時則傳神于語言之外胎骨俱仙矣由此二詩尋味風旨亦何須拈香拾翠綴古事以媚花妖泣斷紅而羞殘粉乎予兄爾承詩旨清和往從白下名人唱酬篇什甚富茲刻特其一斑要不屑襲

人唾餘而絲絲自吐楮墨閒具有色氣落花有靈應從夢中獻笑矣

家譜跋

家侍御本先大父母之教忱慨急難惻隱好施三黨中有一人未暨者輒嗷嗷于懷必覲一端割膚予之使心醉而後已吾宗人多貧歲時繼粟咸有常額娶者嫁者居者葬者育其孤者廩其生而贍其身後之妾者至有恃德不較哀其貧而復收之者稅畝所入半歸子錢家都從生計節縮中黽勉周急尤每嗷嗷于懷曰吾心有餘而力不足終當割產儲糈計口而日給之亦母負標其虛名反以德賈怨蓋吾父之收族之誼見諸行事譜固在方寸閒久矣適伯父近復公續舊譜而新之起百年之墜緒厥功偉焉然彷彿先進遺格提綱類書其于圖式文志闕如也家故藏有文徵錄前人典刑如龜如鑑亦多所散軼吾父慨然以爲己任曰俗惟尚古譜不嫌今刊圖以便觀錄文以垂教使祖宗之澤一新後人之興

有託其在茲乎凡若干卷歷三年乃成斯吾父承先啟後博覽蓄德之大端也躬行而後文之有先于譜者在故小子附著之末簡恭跋先大母行略

傷哉吾父之思先大母也往遭多難先大父危頓于外大母拮据于內垂三十年難平而大母亡矣蓋吾父持家政得歡侍大父者尚十五年惟大母僅中壽吾父弱冠備哀子無一日菽水歡此吾父悲痛之情所以倍深也居恆未嘗不言言未嘗不泣而吾父子兄弟率相對沾襟不樂而罷嗟嗟傷哉不肖即未嘗逮事大母顧朝夕領嚴訓覺遺容宛然懿徽如在一切艱辛勞瘁之狀不啻目擊而心傷焉念風木之恨無窮金石之傳不朽死者以文重文尤以人重先大父志墓之石庶幾文存其實而失大母舊志所謂借銜顯者不特其人非其文亦僞也故吾父每為永恨伏惟當世立言君子名懸霄漢筆凜春秋敢乞一字之褒以增九鼎之重生死載德其何敢忘愚父子曷勝激切懇禱之至

寶持閣問業序

丁巳深秋將之官匡廬下謁巒穉師而行會師門問業刻成是當有言蓋某之問業于師者五易歲半在荒圃半在毘陵師之在毘陵也弟子日益進乃施絳子鐘寺之梧閣戶外履滿師命某與對壘而甲乙之片言之雅必標隻字之俗必斥一時從游者始知文章先雅俗之辨而集中諸子尤師所奇而某所畏者也師居恆筆不欲落一俗字口不欲道一俗語耳不欲納一俗談某步趨唯謹至今亦乞得一山郡以求免為俗吏即年來奔走長安道中面孔塵沒而一披此集覺鐘聲度月梧葉嘯風景色依然雅人深致正復不減坡公云大雅之不作久矣好之而欲學者無其師知之而欲傳者無其徒如吾師之與某及諸子者其真可以相視而笑也夫

程墨觀序

文章山水之觀一也柳子厚紀遊約之曰曠如奧如夫奧與曠于

文章爲孤詣逸才者以颺其廓落空清之致而沈悟者以寫其幽鬱凌峭之思是故風雨集而蛟龍游肺肝鏤而鬼神出也既其所至殆風雅之變乎風雅正變不同要以本之性情不可得而貌也作者曠以開境奧以藏精和之以神悠之以韻先輩風雅庶其在茲風之晚也粗服亂頭曠而野牛鬼蛇神奧而陰下者剝膚拾唾土鼓象人卽詭而遇乎又何觀焉余四年郡齋有閣一楹遙對五老雲霞明滅雪月吐映風風雨雨搖盪曉暮凭闌飛眺若拱若揖揮手招之翻然來翔鬚眉可親心肺人鑒所謂曠與奧者若在衽席之下子厚云意有所極夢亦同趣正難舉以告人昨歲還自粵闡歲將暮矣風雨淒然兀坐閣中稍竊簿書之暇縱觀十五闡之風心口津津手眼互送時有蒼然暮色自遠而至凝于楮墨縹渺之間既未得綴律歌詩以答五老則就諸墨取其壯麗奇偉者當青天削出金芙蓉之章取其蕭靜森孤者當霜雪顏常靜雲煙欲變魂之章取其空遠疏宕者當手懸石鏡照天門之章取其妍媚

娟仙者當影落明湖青黛光之章若乃紅豔綠肥縈青繚白賈客撮綺以搖麗富兒渥瀋以濃羹纒奏一篇而五老已霧隱風怒忽焉遠矣吾不敢觀

知爾篇序

撤棘後得諸君案閒之牘隨手糾擇輒爲簿書奪去旣以仲春彙而梓之人不數義率略美而指瑕諸士得毋以不知己相詬乎夫文章之道寸心千古作者自知予何知焉雖然彼以手傳之吾以眼迎之濃淡異態憎喜異情兩凭尺幅以盡其變而鬚眉意色恍然如或見之者何也迫而相遭者意微而相感者神塵塵相授而不失其本卽凡情世諦尤將遇之驪黃之外況其秀逸絕羣者乎吾自西來匡雲封署文心久已冷寂兩眼蒙蒙焉車塵簿牒豈復能相士而緇衣之好則豈有異也每清夢之餘平旦之氣披髮擁卷晤對諸君子尺幅閒心揣其丰姿骨韻無弗映合者張君更從敗墨中忽焉相感開卷如故噫獨文章之知乎哉是編得失互存

寧落落母碌碌扶微剔瑕于他山之攻或有取焉張忝生年兄聯席易評于諸君有同好者也試以斯言質之

白鹿校藝序

春之仲不佞從太府廣陵袁公後修祀事于鹿洞入廟肅然諸士咸集公爲指引機脈言法而旨已散步亭皋山環木蔭碧澗橫出其前滌澗濺激中石面字痕隱隱可數悉紫陽手劃也不佞顧諸士言曰斯地也夫非紫陽遺澤歟當年盤桓石足指點眼前百世之下恍然見之區區設像陳尸烏有生氣哉且文章心生耳何平何奇何新何故文士縱不能噓此枯毫逼傳聖諦要以寸心所際靈光映發必有一種好光景思沈息轉脈動機行直可噓氣成雲點睛飛去故思無所不入則生氣流楮墨閒生氣動而聖諦不遠坡公所云得其意思所在而已若夫才情各出纖華素質古色幽芳水到渠成初無定局諸士方棲息斯洞剝落凡趣埽淨塵容飛觀乎鹿眠之亭放歌于迴瀾之石文韻文心自覺生生不已苟其

無所得于此也未抽心緒之靈先摹紙幅之影旁拾已殘之膏唾塗成自己之面目則象人無情土鼓不韻而供給應付之語腐息奄奄見者反走矣蓋不佞爲諸士告者如此是編也碣石舒先生宏而綱之公實精而衡之公先闢榛蕪迎舒先生居兩月洞士彬彬先生以憂去公親督課月六試之手持繩墨申之令曰文必闡義義必會真閒運斤一斲叩微探玄得未曾有爲諸士鵠公造士苦心乃甚于士之自造願力宏深多士蒸變紫陽生氣在公襟寸矣不佞向受命校閱甘苦舌端津津欲吐然所言平平止此耳無出公範圍者公不云乎觸手新膚轉瞬枯籜諸士于此轉一解生

白鹿文茸序

予于此道宿有苦心嘗味方旨遭遇知己草草棄去意每念之津津于舌也星渚斗大郡湖山滔莽魚鳥簿書吏得以其暇滄宿香鑪五老之間衙齋清嘯山雲飛席湖風入衣廚不供鮮濃門不窺

臭腐手眼心肺宛然如昨蓋十年來文味道味吏味積此矣廣陵
袁公心期素合文鑒淵深造士熱腸謬推予主鹿洞大巫拱手小
巫登壇遠近諸弟子英英斐斐如白鹿之在羣予乃食以芹蒿不
使舌腥時其呦呦不仗驚吼夫鹿人知其野也長林豐草彼適其
適而以人面機心駭之詎知鹿不謂人野乎諸子之文近于鹿予
入焉不驚至于令其清可啜其韻可歌其采可擷袁公曰有是哉
李子之範乎嗜其肖予謝唯唯否否文心名遇士所自有予何足
肖向固與諸士約各以清心聽水觀山毋以穢腸竊羹拾唾此亦
學道之根而立名之柢也公曰善遂取其文燒燭刪剔取裁于公
得百餘篇公題曰文茸以行

廣東禮記房同門墨卷序

吾之與七子遇也其所可告語者既人綴數言言人人殊也比而
同之何居曰濃淡不一致一澤于理奇正不一情一軌于法淺深
甘苦不一境一本于天機之清妙若是者將無同雖然其可得而

言者非其至者也吾竭十五日夜之心以遇七子于語言文字之
外澄清月白飢渴夢想無往非是而此一段光景正在吾喉舌吐
茹之間微乎微乎譬諸相人者觀其人之瞋喜錯出動止遞變至
于機忘息轉不自知神之所際庶幾一與其人之天遇而後有以
握其契也故曰文神物也七子英年秀質朱子髮甫燥各淵若有
深鑒晤對數四道義之雅津津動人夫交取淡品取素文取真惟
清心也可以無所不入而神不亂七子三日夜之心則吾十五日
夜之心也清之至也故同也易曰同心之言其臭如蘭七子無忘
其所以爲同者哉

余未之稿序

文有情也才也境也三者相生相引而莫知其端夫含毫濡墨紙
上之靈光豎義選言局中之勝子要以才有鬼境有平奇而情
不至總不可語于文是故情生才者也而境者才之所造余子未
之之文深于情其握題也一若以天桃之淑女興懷一若以藜藿

之伊人注想一若勢孤于離騷之幽怨一若神往于梧鳳之賡歌而鼓舞焉而游行焉而刻斲焉塵脂弗以柔其骨凡響弗以腐其韻讀者舌與之化氣與之親而不知其一往深情藏于色香聲味之外至于斯也余謬主白鹿之會每與未之倚長松招五老步月泉閒流杯石畔于時有意授指畫筆點口披者其于才與境織正生熟之關不無他山之助雖然情之所至非天非人余且欲退就北面矣猶憶戊午觀風試直指沁水張公每對予擊節未之推爲西江冠末之知己之感儻亦于公之孤忠勁節有勃然而興者乎夫情之正者歸于忠孝文奚足云未之勉之矣

瞿元亮稿序

論文者至深淺中程濃淡合度而止或曰毋淺而濃捷得焉已矣矯之者曰寧淡若遠山毋濃如翦綵寧深而吸髓毋淺而隔膚此其說名宿之所藏凡眼之所昧于是聰秀之士率借淺淡之致撮深濃之色售不售者半其于捷得之徑弗勝也往予從吳巒釋先

生遊晉陵于晉陵諸社中讀元亮文淺深濃淡各極其致神機法脈無弗合者私爲品之遠山映日紺綠初浮其容也吸髓抽精深入顯出其思也法宜逢年乙丙之歲予幸兩附籍焉長安中塵飛車擾之暇杯酒過從撤骸盟心驪特甚會元亮刻稿成謬以屬予敘夫得心應手之妙作者自知之而或不能自道其所以然矧向凡眼索解乎無已則書向所私擬之言歸之世有法眼當相賞于淺深濃淡之外予一家之言固未可據也

梁兆瑚稿序

蘇長公有言才滿于天下而事不立天下之所少者非才也氣也蓋余嘗試之于文章或意至矣而筆不至或筆至矣而意反若未至格格不行規規若失此無他氣不足故也泉源湧沸萬物怒生虎嘯而風龍行而雲文章以氣爲主頃余來都下友人繆太質久先至止旅邸不遐往相勞苦則風騷病頓之中輒擊節兆瑚之高誼藥餌問遺趾錯于門傾蓋之交情深如是夫非氣有相感者乎

太質曰此骯髒人卓犖志功名因出其釋褐後甯武子一義鳴心
寄志之語有云我而任其易誰當任其難余讀而壯之已得望見
眉宇英英湛湛其制義之全雖未卒業而想見其排空湧雪之奇
擊節叩壺之致則一勺水具大海味矣豈有至有不至者哉古人
興歌伐木比心蘭臭深情一往無非文章兆瑚方且營精以搜刻
海忠介集尚友往哲高視天下其卓然之氣何如也太質固要予
一言遂識之如此

靜遠山房稿序

才須學也學須靜也余門人嶺南朱子潔家園結屋數椽肄業余
顏以靜遠山房寄請曰蓮王父中口故有城東書舍閩少澗游公
書題明志夫澹泊寧靜南陽格言也小子不敏用以佩訓承先其
敢失墜函有近藝取讀之見其一段灑氣可以鞭叱風霆籠罩宇
宙以是信子潔之果能靜也信靜非岑寂謂也夫愛其心以謝其
軫轉者然後可以其心納須彌老氏不云乎玄之又玄眾妙之門

然則驚于眾疑汨玄棲于玄可孕眾靜為玄因遠為眾府宜乎子
潔之服膺余言也勉矣哉李謫仙詩云始聞鍊氣滄金液又道朝
天赴玉京余以此廣靜遠之旨又云靈心圓映三江月彩筆疊成
五色文余以此品靜遠山房之藝一靜也出處政學胥賴之豈直
為才士肄業銘座右也

萬貯山房近藝序

文章之大母曰怒曰喜二者而已才人欽頤巨魄意高調苦乘文
之險潰文之毒而鼓天下之動其氣未有不怒者以此爆聾發聵
攘大科而偶絕席之雄不少然使三年未鳴六翮小挫趾滅而月
寒神枯而香杳形似有餘而風雅不足且幡然自念其前覆矣而
懲轍藥之禍者急以喜救之切脈則筆有深姿選詞則思有定檢
曲終奏雅言外畧情不叛不孤必隱必秀譬之色喜者其意平其
聲靜而其溢而為言也自無洊雷之烈薑桂之辛李贊皇所謂文
之為物靈氣恍惚而來蓋得之于喜者居多而要其時已無復有

寫照窮豆儀毫失牆之事飲羽者往往望乏于此而百不失一也
故士以才爲命以怒爲才而以喜爲用怒用才之本今之善用怒
者或寡矣楚惟世兄久待吾師幕府策馬榆關望小狡之餘氛觀
大人之麾葆酸風赤汗往來孤寄宜其氣多怒及讀近義廉鏘必
裁毫牆必謹趣必炙舌理必絕思確乎不爲鶴灘鍾斗以下諸匠
手法律而其韻流鋒發又不肯以五都之市讓今之爲食鮮吐秀
者殆所謂以喜用怒者非耶年來逸事或以怒債或以喜潰吾師
以方召行邊三年于茲鸚懼棄林免忙迷穴闖謀廟算搏一掌于
九拂之外王庭之空可旦夕計而沈雄淵渺神明之用莫窺其際
蓋孔明之忠誠穉圭之膽似師所得力此居大端楚惟朝夕神授
而發之爲文章故膽張而熙說至此也雖然逗陰符之藏握堅忍
之力于以爆聲發贖駕風霆而上之苟龍固濟濟哉吾必以楚惟
爲賈虎之最怒者

金任夫飛草序

往予爲文好作白想蓋由才具不饒所翻閱時刻忽忽善忘正如
貧兒挑菜煮水作苦自甘大家鼎鑪鮮濃都無緣入供每削一牘
觀者訝其淡寂而予心血特費思遠則選其言機行則務其法長
午繼燭率不了一二義霍林先生有言凡情之往竭于思聖意之
來迎于息庶幾服膺此語近爲匡士廣之曰思者文之種也種活
則生氣流楮墨閒生氣流而聖諦不遠坡公所云得其意思所在
而已今才士跳浪鬪擊呼盧狂舞其受病乃與俗士等夫生氣云
者活此真種可以謝喧入寂其息深深可以天動神行其樂洩洩
譬如山根靈而雲飛木液深而花秀詎與累石爲峰綴葉以綵同
凡眸之塵豔哉善乎吾友阮集之之序金任夫稿也題之曰飛旨
以靈活三復斯言實爲印可任夫思不讓予而才乃大過予即白
戰不持寸鐵而刀斧劍戟在其掌上即素供不著纖膩而色香鹽
味在我舌端非任夫不證此訣非集之不識此寶子時誦之以對
匡君不知何物可舉似直以風雨雲月早暮陰晴之變愧不能一

語以對匡君者持此爲眺詠之勝自今五老峰頭又何煩索謝眺詩也

伯兄近稿序

予兄弟十餘年共事此道不相師也而好相繩兄文以深微爲宗絲絲相續筆曲徑幽予心賞之顧每援筆判之曰是半含半吐者不可一言了之乎兄曰是也然吾自了吾心則就予疏音朗節中取一二輕微點染之語指爲文境予輒亦自喜而心弗盡謂然已從吳巒穉先生遊導以脈引以機繩以法予兄弟始知所歸宿枯思禿穎庶幾一字一句之合也猶憶假館鐘寺麥飯乾魚爨煙逼几兩人呬唔其中僧靜鐘沈蕭瑟桐吹夢覺互答握管凝思予袖手結腸幾欲淚落而兄至艱想時往往怒裂數紙嗟乎予兄弟之于此道苦矣今予僕僕山城悵然懷想不知獨吟之緒是苦是甘近者函來數義讀之欣然而笑有是哉一言而了數言而亦了義與題相迎心與手相肖機行脈會而法乃止焉竟弗知所欲繩者

有何字何句也塵劫慵心無復能尋味妙旨商量別緒聊爾書此助金蕉坡下一帆風耳

竹居記言自序

經義寂寥久矣支說所沿作者迴旋依附而不能自開其心故旨則樹之籬語亦剽其宿遑問本義哉予幼時執經于顧乘蚪先生先生謝去註腳依空傳解每課一題率告以直伸所懷予亦微有領入愧凡資短晷斷墨無多未了學人之事詎謂草草以一經先人也賈人索牘不復自辨好醜浪擲以去邇于刑書之眼檢次前刻結習相煎舉筆有喜稍稍簡剔敗思剝落陳暈刪竄者半之雖骨體如昨而衫履故別矣觀者舍其文姑取其心焉己未夏書于匡城之友五軒

雜文

記夢

己未之冬望前一夕以課士宿鹿洞步於林皋雲月濛濛不盡幽

賞之懷檢次游名山記奇巒異壑此心飄然萬山之上矣抱寒衾
理孤寢乃夢登天池篆煙幽閣了非人境汗漫游屐忽陟一巔問
其名曰石雲也一峰插水石齒攢嶙森如奇鬼搏人倚峰而坐僧
龕甚幽水光入簾搖搖心目卷簾窺之水石相涵神光四映峰上
下都作寶色驚喜讚歎語家伯子曰是琥珀峰也卻亦不知伯子
何自入山遂共尋勝亦相與問途若有若無非近非遠忽又入一
精舍激水飛泉如珠如雪風鼓室搖寒不可立其後有峰崔嵬巒
岈互天際透迤而下乃爲石掌掌作蓮花片片參錯湧出室四面
皆然環掌有泉淵泓亭乳蜿蜒如壁淨徹可鑿泉外圍峰曲折高
下如笙之絲竹如筆架之齊尖如翠屏之映彩山僧爲予言此石
門也其西北隅一石壁有方寶聳身入焉乞得大士淨水一甌入
手覆地掬取餘滴入口都不辨何香味顧視石巔下臨無際有雕
闌環接梯之以行柔脆欲斷予心怖甚伯子驚墮矣若大士挈之
得免攀延數百丈而下則懸崖絕磴煙雲飛泉都失所在見家大

人端坐一室驚告其故曰女夢耶予恍惚未答濡毫染翰若將吟
詩忽焉驚寐枕畔松風依稀夢境也

奏考辭賀文

某生平最不喜人頌說其錫之自上也將以攷功罪我避名也乎
哉其懷之自下也將以信是非毋速謗焉可矣若寮長以規吾過
賢士大夫矚吾愚而共事之諸邑君與庠之師弟子以佐吾不逮
尤母取于頌說爲也憶初第時書生怯瞻世故驚心慚獨立之訛
音危操刀之傷指意之一氈徐商仕學家大人呵之曰而祖父世
茲青衫窮而白首孺子乃倖坐獲焉學居人後名在人先天子與
爾進賢冠豈使汝優游齋宿安致厚實乎一命之士可以澤人今
往司理毋弱毋殘羣物惟和守已惟寒三年者天子又將以恩綸
報而父若母何負于汝而居逸避勞利已而後親某拜受教兢兢
以來而今幸託同堂之左提右挈邦士大夫及共事諸君子之以
勸以警得有以成家大人之命也報國多慚對民多忤蕭然藿食

酬德無資而又敢辱頌說以益其媿乎華言綺辯蒙面非情錦質
繡章素囊不韻知我愛我在末路之交維卻之卻之敢前言之是
矢

護生園疏

佛家以貪瞋癡爲三病如我所說亦是三大因緣何以故諸佛菩
薩見身說法貪可化慳瞋可立懦癡可以埽落一切聰明意見而
世閒諸比丘乃至墜入三病以鉢施爲龍斷以祇園爲糞囊爭攘
占割如田舍翁之謀子孫者悲夫顧山觀音寺其來舊矣上方之
後山周遭若干步樵牧不禁松杉遂凋荒草迷離風日直下余過
而問之具知山民以爲外府僧徒坐視莫有護者利不博歟責不
專歟力不敵歟往余聞長老言寺向爲有力者燬而墓今墓在殿
後數武有孫披緇以謝宿業余因歎佛力之大而豪有力之營穴
覬福者拙也若因其固然築垣爲界使竹樹森蔭鳴禽高翔繒繳
之施望而卻步詎非一因緣大事乎寺故奉關神爲護法側居東

廡廟貌不虔家侍御方構樓三楹以供神而垣高以仞長以百丈
其費既奢僧興慈慨然矢志將畢力而公之曰護生園余故爲一
言以告諸四方大慈悲者雖然藩籬一設畛域遂分是教之貪瞋
癡者余罪也夫

楊舍東城茶亭後閣記

經言施者一鎰一縷皆得作佛何以故如一滴水具大海味是一
念緣了無量法非愛非懼不忍故舍此不忍心佛說慈悲斷絕一
切人相我相及多寡相卽心卽佛無法可說一縷所引絲絲皆續
一燈常紅光明圓滿如來眾生等如是觀有何差別我聞楊舍有
一居士名曰某某創此善緣構亭浚井普濟渴者願廣力微諸大
檀越歡喜布舍爰建斯閣田若干畝有僧是主凡此閣中瓦石木
屑杯水微塵聚眾慈心普大法雨伸餘張子具爲予言向此居士
鄰屠肆閒冤號交作合掌拜語滅度是人是人悲悔念轉刀落而
此居士勤閱事母母食斯食母喜亦喜依依母旁宛宛孺子以供

母餘廣作佛事予時聞之贊歎希有人之無良忍于其親何有他人滅離父母非佛宗旨惟此居士含赤子心發慈閔性俾鼓刀手立地成佛俾行道人望樓止渴嗟夫斯地斯民或愚或黠窮一忍心鼓刀以屠戕禽獸生乃至結習鼓筆如刀吸生民血析骨易子供彼吞殘是可忍也其孰能說嘻願力無盡冷煖自知法因隨喜業根斯斷請登斯閣惻然興思瞿然前指則此施者是眞導師仲餘愴然曰請以吾子之言告也

乞言小引

新歲庚申則家大人五十初壽也壽于五居百歲之中家大人精完神壯纔如強仕之年朝夕課子治垣身親拮据如貧家之故小子寒吏矢西江一杯水則問衣問舖航米航書歲不絕于往來一惟家大人耕貸所出如兒之在襁褓而噓飢號寒于膝下之初也又安所取高堂養老之義以云慶乎顧自念之元日之弗拜于堂者兩年于此今壽且五之元羈三千里外綵舞之無從庶幾乞名

公大人一言爲寵而亦弗敢遠布其私以違家大人母近名母徇私之教則謹近告之于知己之前家大人之篤于孝也幼鍾大母陶孺人之愛弱冠而大母殞于辛動抑鬱之交旦語之且泣暮語之暮泣酒酣淚落恆于斯屐折痛心恆于斯則構思亭三十年低徊噓涕其下顧招朋擊鮮色養大父者不敢以隱痛傷大父心也且富而好義世或有之若夫風櫛雨沐焦心勞思時待子錢家以舉火而勉強支持愴慨施予問從伯祖之貧而賢者計日廩之間伯叔兄弟歲時額餽之間親戚之衰落者構椽以居之不能婚嫁捐金以代了之至先世強鄰今爲覆卵里黨甘心焉乃獨棄怨周急肉其瘠而生全之其他閭里友朋觴酒豆肉之爭兄弟骨肉之際一言解紛數金捐助者不勝書也獨生平意氣伉直不能低語媚人然屈意于貧賤唾面可乾激厲于富貴惡聲必反以故弱者親而強者畏貴黨每爲斂手而單丁不苦勢摧東南糧役中人傾家富室詭逃貴則例免小子幸博一第家大人弗忍累里人也出

而請役如故蓋篤于風義又如此課某兄弟嚴且勤百里延師率質衣以供脩脯朝盼夜語流涕責督及小子來官茲土諄諄以手不持錢爲訓且曰家中舊逋薄田可償省他家青衣坐食之費以支門戶官下之需汝勿念也家大人之超越恆情又何如哉家居蕭靜隨緣自娛大率園遊酒亭列楹繕室斯三十年以之而今亦不過爾爾從前概可睹焉小子未敢煩言縷指姑陳其概備采擇焉

天啟四年水災請改折揭

揭爲水災甚重民力不支伏乞當事通融酌處以完公課以救子黎事三吳財賦甲于東南累年加派民不堪命近復不幸罹此洪水情迫勢危種種見于縉紳父老之疏揭頃巡撫周公祖再疏奏聞業徼聖恩行勘矣某等何庸更贅惟是救荒之策不出蠲振兩端區區勸助于民間終是醫瘡而剜肉當此三空四盡庚癸頻呼請帑旣力竭于籲天畱稅又勢窮于仰屋卽求如嘉靖七年及萬

曆十七年一切蠲免之例恐難幾幸于衿捉肘見之時求所以救此嗷嗷乎其洵洵下可以寬民而上亦無損國儲者惟有三十六年漕糧改折停徵五分之例爲兩便之術耳竊聞當事者憂國後民尚戛戛乎難之嗟乎天雨地沈有目共見呼天泣地有耳共聞且某等同爲臣子身處漏舟顧私鄉井而忘國家義豈敢出哉振不敢望而議蠲蠲不敢言而議折折之不得不行者非情也勢也無田米從何出無米糧從何辦官不能令而嚴刑以督必將重殘乎民而民病民不能應而逋賦以逃必將重懲乎官而官亦病其究官與民交病而漕終必不如額也則何如折之便且不折則必議糴矣糴有糴之本縣官無點金之術勢必倍徵于民熒熒子遺能復堪此乎則何如折之便糴必有糴之人縣官無分身之法將僉報商人則商人必逃將僉報富戶而富戶已盡儻委任佐貳而佐貳學爲商賈未必能逐什一以無虧糴本害仍在民也則何如折之便糴必有糴之地吳中大饑越亦告饑將取粟于豫章荆楚

之遠乎往返數千里不獨風濤險阻恐蹈不測且誤漕期矣則何如折之便糴必有糴之舟江南輕舫入江則覆防汛沙船與盜相持而回空之軍船必不肯迂道江湖以候糴然則船隻何從打造篙工舵師何從雇募哉則何如折之便況乎今年之兌已入初秋明歲回空又將踰夏欲正冬間開兌之漕規轉眼是五年冬糧之新運是折亦歷一年不折亦歷一年也則何如折之便凡此數端皆明白易見非有飾說所謂無米之炊卽巧婦束手者某等用是不憚從士民之後再伸前請非不知太倉空虛國儲爲重而救焚拯溺事勢使然否則繪鄭俠之圖者方痛哭以叩閭握桑孔之籌者尚按額而責賦數百萬嗷嗷待哺之眾救死不贍窮極變生必至挺而走險患且不止脫巾者也至于蠲振無論多寡涓滴亦屬聖恩主張是在政府災傷無論輕重纖毫難欺官府勘實是在巡方又無俟某等之喋喋矣統惟當事俯賜裁察亟酌通變之方爲救災之務還就寬民之術爲裕國之謀災黎幸甚重地幸甚謹

揭

又代在籍鄉紳公揭

揭爲三吳水患異常常郡困窮已極懇乞特賜題請大開蠲振以救遺黎以杜隱亂事竊惟四郡之在東南澤國也其稔則貢府也其裨則茅藪也而常郡之在四郡中土最瘠薄斥鹵礪确居半樂歲所入畝不一鍾人鮮蓋藏瓶壘易罄其在今日則尤支毛已盡之秋也其地西界吳興東偏吳淞一葦可達萑苻每多嘯聚昨歲新孽甫除餘氛易煽又洶洶喜亂之時也不幸商羊爲祟自四月以至六月大雨傾注窮晝歷夜不休武無宜環太湖爲壤江靖介在江滸金陵東注之水俱由湖以達江海湖溢不能受故平土化而爲沼室廬傾圮邱隴漂流風帆挂于簷端炊釜懸于樹杪麥未收而已腐秧欲插而平沈較之萬曆三十六年水勢更高二尺淫潦復入三秋嗟此遺黎黿鼉之與居而魚鼈之與處蓋亦鄭圖之所不能繪而賈淚之所不忍揮也卽地方公祖父母加意撫綏設

法安輯然鄰邦無可移之粟富人無可指之困飢民嗷嗷人情洵
洵弱者轉于溝壑強者去而剽掠若非朝廷大沛恩波議蠲議振
議改折爲窮民緩旦夕之命則常不爲東克之續不已也查嘉靖
七年世廟軫念重災一切稅糧盡數蠲免萬曆十七年神廟于蠲
免外特遣科臣齋帑銀三十萬振濟三十六年漕糧等項正米每
石改折五錢緩征其半又另發稅銀五萬兩及畱織造等銀備振
成例具在祖德可思今物力凋耗不似皇祖時之殷繁人心思逞
不似皇祖時之安靜時當極敝之會而災爲獨甚之災廟堂之上
忍坐視百萬生靈之嗥飢而不爲之引手推食乎且使其繫繫坐
斃猶可言也使其量湯割之水以爲粟捧懷襄之士以爲貲接洵
湧澎湃之江湖以爲籍而應公家之賦相率掉臂以去不可言也
故亟下改折之令示緩征之期以安人心而平米價尤萬萬不可
緩也况邇來漕運道梗回空濡滯今歲之兌旣緩明歲之運益遲
年歷一年催償無策乘此大荒之年嘿設調停之法議折一歲以

正漕期損額外耗贈以寬民省蜚輓之勞苦以恤軍而卽合牽輓
腳耗之費以折放京軍之月餉一舉而三利備焉何吝而不爲也
不然民已無居無食何處問田問米責有司以徵收催兌將問之
馮夷之宮溝壑之骨乎勢有所必不能而害有所不可測當事大
老酌量才緩急之間當有不待辭之畢者某等目擊巨浸驚心慘
骨在常言常呼天萬里合詞陳控非無病之吟伏惟憂國者俯賜
垂察亟請蠲振并從改折之議庶幾免支旦夕少延喘息以爲世
世急公趨義之氓雖脂枯髓竭而無怨謹揭

白鹿書院會規

照得本府造就諸士三年苦心延師布席口語手披不啻父兄之
視子弟也乃洞主一行大羣遂渙試事再倦故業半捐至今而荒
蕪極矣諸士自謂傲首青衿挂名鹿洞小敵易勇河伯自驕如斯
而已乎否者此誰之功名誰之心手中道自畫悠悠汎汎以至于
此本廳落落分校擾擾事途意雖熱而眼已塵署雖閒而局有在

偶勤藥石之苦未見瞑眩之功今本府言念初盟氣衰再鼓既身
作之師更分委之任本廳誼無可謝聊效他山借粥教以明刑雜
簿書于帖括非云執牛耳也庶幾解尸素乎諸士其聽予言

計開

一穿窬之心士所宜亟去也詩家論三偷之中偷語最爲鈍賊其
次偷意其次偷勢夫文亦然一題有一題之文一人有一人之
文先輩名家已是糠糲芻狗矧坊刻惡濫連篇直書拾殘唾以
塗眉認塵羹爲指嚮彼此爭剽而互奪生機埋殺于紙刀四端
俱絕在穿窬下矣有犯此者墨其面而移之郊
一俠邪之遊此中絕少飲博之習似亦無多惟是分金塊肉微利
所歸輒鼓脣居閒往來說合肺腸一穢荆棘叢生諸士既有志
洞中其以清心聽水觀山沈思默想泉聲松韻點點文心白石
寒雲頭頭是道毋以米鹽雜彘擾清夜之魂毋以簧舌筆刀張
白日之械其有一語關白假公說私者斥出會外仍紀三等簿

以創其敗羣

一心靈各具妙在苦思靈使語生毋令氣腐靈使曳白毋取苟完
果能精心獨造一篇亦勝數篇至于土音譌字務清洗一番每
見此中之文至致而如僅近往往錯寫之乎者也耶哉動多誤
用然豈抑乃夫蓋率是倒行斯爲文理不通何暇高談妙旨今
後各自留心勿傳笑柄

一教雖無類博則不專夫郡縣各有官牆何地不爲造士所以育
之鹿洞者正爲拔其英異加意甄陶原非汎示包羅集汗藪澤
且本廳職在刑名勢難以全付精神盡歸校閱今會中諸士業
有成額此外有願裏糧洞中者兩試皆優亦與收錄若不係久
居隨聲附和者概不收入其遠方好學千里而來者又當別論
一文無高下幾行卽佳妙旨難言多作自遇今一月止初二十六
兩會抒寫幾何竊恐常業多荒文心易斷因立小會以二六爲
期卽以大會一二名輪爲會長副執筆評次轉送本廳覆閱若

會長副徇情阿諛者罰諸生氣驕心昧以塗抹後言者斥
一洞中一椽一木俱關先賢遺澤昔郭有道夜宿逆旅明且必灑
埽而去古人用心如此諸生習業斯洞務埽泉亭之落葉遠書
舍之爨煙儻有穢汙山靈厭女

落落齋遺集卷十

右先人遺集凡十卷不肖遜之謹一一編輯而泣然淚下不能禁
也先人自丙辰通籍迄丙寅被難敷歷中外垂十載初任南康司
理康素稱瘠郡先人謂寒泉白石適愜素心一時吏治清嚴爲西
江冠主盟白鹿書院論文造士至今匡山蠡水間沐浴遺澤者尚
人人能口之也癸亥入西臺時正人嚮用如趙忠毅公高忠憲公
楊忠烈公輩皆傾心相與而魏忠節公于同籍中尤爲莫逆故甲
子遂膺管章奏之差忌者自此眈眈矣先人故伉直成性遇事不
阿屢觸兇鋒竟罹殺身奇禍嗚呼傷哉維時遜之年甫九齡猶在
襁褓耳所遺詩文雜稿盡爲大父收藏遜之稍長請諸大父欲詮
次以付梓人而大父每一省及輒哽咽不忍言遜之恐傷大父心
亦哽咽不敢言也迄今閱二十年所始得一簡集之而遺失者種
種此遜之所以泣然泣下益不能禁也嗚呼傷哉先人少而勤學
手不釋卷猶自謂恨不十年讀書于學道明理少進一籌迨服官
西臺總以憂國憂君之苦心發爲嫉邪指佞之正論疏草二卷皆

剖肝瀝血直以生死置之度外者計先後凡十五疏又代堂草者
六悉經先人手定外存笥草四首則遜之從敗紙中簡錄補入所
軼不存者劾逆璫十六大罪疏稿已具矣爲友人所燬未幾而楊
忠烈之疏入故繼忠烈而擊璫者先人也嗣是削逐投間待罪檻
車思親念君倦焉不釋往往託吟詠以見志則有受命歸田二草
其餘雜詩又有息影三遊別匡諸草爲去康歸省時作招五草爲
司理時作孤興倚雪二篇則丁巳謁選北上丙辰假歸途中作學
餘草則未第時作也亦皆先人手定一仍其舊西臺書牘三卷于
往還酬答中諄諄國是民情滿懷熱血徧號同人疏草所不能盡
者此盡之業散失幾半謹就存者以先後爲序理署書牘存十之
一二商榷地方政事者列之前寄答朋友者列之後家書似無緊
要然先人居官立身與所以處父子兄弟間者可概見于此故併
存焉若被逮後與獄中遺筆臨難夷然語不及私此遜之所不忍
讀讀而不忍竟者正可與天下共見之也雜文一卷半爲酬應之

文所存無幾然片紙隻字皆同拱璧不忍廢也嗚呼傷哉先人素
履可表當世者豈必以文傳而因文以見人則忠孝之節清白之
行寧言之而未盡毋言之而或夸血雖化爲碧燐志克見于青簡
在小子過庭如在固儼然手澤之猶新而遺言國門可懸則庶幾
後進之見式一展卷而徽猷可卽志意斯存此遜之所爲旣一一
編輯而泣然淚下不能禁也時崇禎甲申春季男遜之百拜識

落落齋集附錄

贈通議大夫太僕寺卿李應昇誥命一道

奉天承運皇帝制曰朕聞李膺之被鉤黨也曰事不辭難罪不逃刑三復斯言數為太息而先朝有志義之士致死于逆閹之手其無愧斯言矣朕豈靳卹死以勸生乎爾原任福建道監察御史李應昇少讀古人之書長懷世道之慮名節忠義學務立其大端介直廉明志恥獨為君子司郡理而著明允為御史而茂風裁保身修省愛君有加于痛哭撫時補救謀國實切于徙薪擊奸臣之貪狀于方張朝廷已為動色鋤逆閹之禍機于叵測天下以望澄清暨乎郎官杖死于廷御史之刑于野而爾請旌死以作敢言之氣疏緩刑以挫殺士之鋒削逐投閒禍亂益烈服檻車而致諸獄已諒叫閻之無從備五毒而殞其軀尚期尸諫之有悟舌可斷而辭不可屈骨可銷而心不可灰于今生氣猶存其若死者可作用以覃恩贈爾階通議大夫太僕寺正卿錫之誥命於戲國家立于天

地士氣爲之楛柱逃刑不若赴獄之安仁仰藥豈如碎身之抗義
嚴焦芳之削奪不及用爾身而旣行爾志尸逆闔于都市可以雪
爾憤而永著爾忠崇禎元年十月□日

明史列傳

李應昇字仲達江陰人萬曆四十四年進士授南康推官出無辜
十九人於死寘大猾數人重辟士民服其公廉爲之謠曰前林後
李清和無比林謂晉江林學曾卒官南京戶部侍郎以清慎著稱
者也九江南康間有柯陳二大族相傳陳友諒苗裔負固強梗嘗
拒捕有司議兵之應昇單騎往諭皆叩頭聽命出其所匿罪人一方
以定天啟二年徵授御史謁假歸明年秋還朝時天子闇弱庶政
怠弛應昇上疏曰方今遼土淪沒黔蜀用兵紅夷之醜未息西部
之賞日增逃兵肆掠於畿輔窮民待盡於催科逗遛習慣大將畏
敵而不敢前法紀陵夷驕兵鼓譟而弗能問在在增官日日會議
覆疏衍爲故套嚴旨等若空言陛下不先振竦精神發皇志氣羣


臣孰肯任怨以破情面之世界者祖宗有早午晚三朝猶時御便
殿咨訪時政願俯納臣言奮然力行天下事尚可爲也報聞頃之
復陳時政略曰今天下敝壞極矣在君臣奮興而力圖之陛下振
紀綱則片紙若霆大臣捐私曲則千里運掌臺諫任糾彈則百司
飲冰今勳議增官爲人營窟紛紜遷徙名實乖張自登萊增巡撫
而侵冒百餘萬增招練監軍而侵冒又十餘萬邊關內地將領如
蟻剝軍侵饑又不知幾十萬增置總督何補塞垣增置京堂何裨
政事樞貳添注矣孰慷慨以行邊司空添注矣孰拮据以儲備大
將添注矣祇工媒孽而縱逋逃禮兵司屬添注二三十人矣誰儲
邊才而精典禮濫開邊俸捷徑然灰則吏治日壞白衣攘臂邪人
入幕則奸弁充斥臣請斷自聖心一切報罷又言今事下部曹十
九寢閣宜重申國典明正將領之罪錦衣旂尉半歸權□要宜遣
官巡視如京營之制衛官襲職比試不嚴宜申明舊章無使倖進
將校蠶食逃軍不招私幕乞兒半分其饜宜力爲創懲窮民敲扑

號哭滿庭奸吏侵漁福堂安坐宜嚴其法制時不能用俄劾南京都御史王永光庇部郎范得志顛倒公論永光尋自引去四年正月疏陳外番內盜及小人三患譏切近習魏忠賢惡之已復疏陳民隱言有十害宜急除五反宜急去帝爲戒飭所司京師一日地三震疏請保護聖躬速停內操忠賢領東廠好用立枷有重三百斤者不數日即死先後死者六七十人應昇極言宜罷忠賢大恨應昇知忠賢必禍國密草疏列其十六罪將上爲兄所知攘其疏毀之怏怏而止楊漣劾忠賢得嚴旨應昇憤即抗疏繼之中言從來奄人之禍其始莫不有小忠小信以固結主心根株既深毒手乃肆今陛下明知其罪曲賜包容被緩則圖自全之計急則作走險之謀蕭牆之間能無隱禍故忠賢一日不去則陛下一日不安臣爲陛下計莫如聽忠賢引退以全其命爲忠賢計亦莫若早自引決以乞帷蓋之恩不然惡稔貫盈他日欲保首領不可得矣又曰君側不清安用彼相一時寵利有盡千秋青史難欺不欲爲劉

健謝遷者并不能爲東陽儻畫策投歡不幾與焦芳同傳耶時魏廣微方深結忠賢爲之謀主知應昇譏已大恨萬憬之死也應昇極言廷杖不可再士氣不可折譏切忠賢輩甚至已代高攀龍草疏劾崔呈秀呈秀官昏夜款門長跪乞哀應昇正色固拒含怒而去十月朔帝廟享頒曆廣微後至爲魏大中等所糾廣微恚辦疏詆言者應昇復抗疏論之且曰廣微父允貞爲言官得罪輔臣以去聲施至今廣微奈何比言官路馬斥爲此輩夫不與此輩爲伍者必別與一輩爲緣乞陛下戒諭廣微退讀父書保其家聲毋倚三窟與言官爲難他日庶可見乃父地下廣微益怒謀之忠賢將鐫秩首輔韓爌力救乃奪祿一年其月趙南星等悉被逐朝事大變明年三月工部主事曹欽程劾應昇護法東林遂削籍忠賢恨未已六年三月假李實劾周起元疏入應昇名遂逮下詔獄酷掠坐贓三千尋於閏六月二日斃之年甫三十四崇禎初贈太僕卿錄一子福王時追諡忠毅

落落齋集附錄

右落落齋遺集十卷明李應昇撰應昇字仲達江陰人萬曆四十四年進士官至監察御史懼璫禍下獄死崇禎朝賜卹弘光時追諡忠毅事蹟具明史本傳仲達通籍最早爲南康推官士民服其政任御史上疏糾魏忠賢繼應山之後深論璫禍之可畏再言死諫之可哀剖肝瀝血以冀主上之一悟他如糾王永光糾魏廣微代院長糾崔呈秀危言讜論諸奸切齒當魏闖杖殺萬憬大索林汝翥削逐高攀龍等其勢如火之燎原不可嚮邇仲達忠忱耿耿獨蹈危機而不悔其忠貞不可及崇禎御宇元惡旣殄廣微呈秀名列閹黨永光倖逃法網猶思護持殘局其人品固何如不得云所言過激矣仲達與繆當時至戚平居往還手札均以大義相切礪先後就逮同死詔獄而明社亦屋矣此集爲其子遜之所編輯頗爲完整刻於崇禎甲申弘光建國之後版久不存邑人亦鮮有藏者赤岸李氏祠宇尚存全帙光緒丙戌後裔某挾書赴都求邑人致函王一梧學使集款重刻未成夏君彥保錄一副本今與從



野堂集同刊以行亦足懃忠魄於九原已光緒丙申花朝盛宣懷跋

